

東
華
續
錄

東華續錄

同治二十

臣王先謙敬編

臣張式恭恭校

三月戊申譚廷襄奏

臣

於長城將次攻克卽飭蘭費等縣乘各寨

匪情震懾相機剿撫兼施當經費縣知縣王成謙等密派文章李
庶等諭令投誠寨首張芳義約會岐泉山各寨於二月初三初五
等日率眾進攻梁邱捻黨立功自贖互有殺傷張芳義等復於初
九日隨同官軍由黑風口進隊與盤踞開陽等處之捻首陳雙頂
等先後接仗殺賊三十餘名生擒張復懋等三名又將吳固匪首
朱玉秀擒斬並獲其子朱雨及夥黨朱玉河等四名正法二月十
四日沂州府知府文彬署蘭山縣知縣長賡探知郡西各匪糾眾
欲爲李城援應文彬等派隊在磊石園迤東斃賊七八十名匪勢

敗而復聚又追殺四十餘名生擒長髮賊目四名各匪聞風恐懼
總兵黃國瑞收撫杜家堡投誠之杜鳳儀後撥隊進攻作子圩該
匪首孫城吉逃竄將其弟孫城罄等數十名正法並據蘭陵圩將
匪首杜荃德等二十五名捆送一併正法其時岐山匪首孫化詳
襲踞中村宋三剛匪圩將其家屬戕害宋三剛宋斌萬家生等均
各憤激赴營投首情願殺賊自效十七日黃國瑞紮營中村圩外
旋有臥牛山磊石兩圩聞風就撫十九日先攻附近中村之朱柳
莊匪圩以分其勢孫化詳帶隊突出欲鈔我軍後路當經回軍擊
退斃賊數十名二十一日晚黃國瑞復往朱柳莊進攻該匪瓢石
槍礮如雨我軍奮勇爬牆噴筒火箭並發圩內登時火起黃國瑞
督同弁兵一擁齊上乘勢攻入殺賊無數復截殺竄匪一百餘名
又分隊往攻礦坑薛南兩圩賊已先逃當將良民收撫見仍督隊

環攻中村臣查蘭費匪圍上年經臣督令奎芳長賡王成謙等疊次攻克不下二三十處茲因兵威大震爭自投誠其中如宋斌宋三剛萬家生等皆係兇狡之徒誠恐急則來歸緩則生變見已密飭黃國瑞妥爲駕馭驅令殺賊作以毒攻毒之計省我兵力至中村在蘭費之交與岐山同爲著名匪穴見在岐山匪首孫化詳龔踞中村經黃國瑞督隊圍攻臣又飭長賡帶勇前往協助中村破則岐山自必瓦解惟梁邱爲費縣西路衝要之區與寶泉固及鳳凰山東南寨門相距均不及百里見在王成謙已將梁邱迤北之吳王岡等圩收復督令就近進取梁邱祇因兵力太單不能驟克梁邱不破寶泉固亦虞牽掣臣已函令黃國瑞俟中村事竣先攻梁邱次攻寶泉固卽以全力專注鳳凰山東南可期次第得手至鄒縣教匪雖經截擊收復山頭等圩而嶧山仍有夥黨臣又飛飭

著運司恩錫嚴督各隊設法迅攻一面函催德楞額等迅速出隊
會同併力剿辦 上諭議政王軍機大臣等譚廷襄奏官軍剿撫
蘭費圍寨並進攻中村幅匪截剿教匪各情形一摺卽著譚廷襄
督飭黃國瑞等速克中村以次進攻梁邱寶泉嶺及鳳凰山賊巢
並飭恩錫等迅將嶧山教匪夥黨設法進攻埽除羣醜其投誠之
宋斌宋三剛萬家生等兇狡之徒固不可靠卽張芳義杜鳳儀等
亦須察其誠僞毋得任令各該文武輕率受降致日後頻多反側
淄川近日軍情如何著查明速奏續派之曾逢年間其年老不能
乘騎究竟帶兵能否出力著一併迅速覆奏另片奏近日河東張
錫珠股匪疊被剿擊已極窮蹙見在河東冠館一帶並無大股河
西徐村一帶僅聞尙有敗匪當可迅就廓清等語與崇厚近日奏
報情形殊多歧異崇厚近日奏稱東匪分股竄至雞澤肥鄉經恆

齡等分兵兜剿又東省續有賊匪數千渡河在邱縣一帶游弋此次譚廷襄摺內並未提及於河西情形全形隔膜恐僅據各屬及帶兵員弁稟報之詞枝梧搪塞於地方賊情並未確加偵探昨經寄諭該前撫等以山東股匪屢次西竄該省總未能豫爲攔截飭令此後如賊被剿回竄務當嚴檄各營會同直省官軍合力兜剿著譚廷襄懍遵前旨嚴督所屬實力辦理並將賊情確探與劉長佑等隨時聯絡聲勢毋致此拏彼竄任令逆蹤延蔓自干咎戾將此由六百里諭令知之○諭張之萬禁河南州縣豫徵錢糧○己酉諭議政王軍機大臣等張之萬奏東匪竄偃臨漳續派新募楚勇迎剿並會毛昶熙奏豫捻竄偃楚疆見與楚軍會剿各一摺前因直省東匪被擊南竄當經諭令張之萬等以賊南竄正當豫疆卽嚴飭河北文武探蹤迎擊力保完善茲據奏稱賊已竄近臨漳

副將楊長春於張里集迎頭截擊屢卻賊鋒聞東南一帶喊聲賊馬盡向東南狂奔旋又有馬賊繞出臨漳之南張村集竄至三台駐紮及由曹村孫陶各口直撲河岸並有步賊數百潛蹤偷渡均經河北地方文武悉力堵禦河北邊防僅隔漳河一水亟應竭力嚴防豫省各軍分剿陳大禧及正陽新蔡項城各路之賊均屬不能抽撥著張之萬督飭楊長春與遊擊徐連陞等兩軍併力堵剿與直隸渡河追剿之軍會合兜圍將股賊速行殄滅並催令參將敖天印所帶新募楚勇星速馳赴河北地方以厚兵力劉長佑計當到營著卽督率諸軍將河西股匪迅圖剿辦飭令渡河追賊之軍跟蹤緊躡僧格林沁何日可由淮北啟行此時如由亳州北來正可迎剿河朔竄匪著卽一路探蹤攔頭截擊河朔接壤晉省如果南北兩面剿賊喫緊恐賊挺走橫逸潞澤一帶並著英桂豫爲

嚴防飭令各該地方認真豫備毋或疏虞陳大喜以漏刃餘生句
結北捻被汝軍於張岡剿敗之後鋌險南竄余際昌一軍由白雀
園虎頭關節節追剿直至麻城縣境辦理尙屬得手張之萬早經
函會鄂省派兵兜剿本日嚴樹森所奏總兵楊朝林卽係駐紮麻
城業經諭令該撫速飭迎剿如其兵力尙單卽令添兵協剿仍著
張之萬飭令余際昌乘勢進擊與楚軍前截後追諒此敗殘餘匪
不難一鼓殲除第須將其全股殄滅渠魁擒戮毋任再行漏網復
滋蔓延信陽州之明港驛業經收復所有該州應行修復驛道買
補驛馬之處著張之萬飭屬迅速辦理並飭確山遂平鄧城臨潁
等縣一體遵照信陽地方被賊蹂躪如須酌予津貼或暫時借撥
經費在後籌還歸款均卽酌量辦理總期往返迅速有裨軍務正
在寄諭間崇厚奏報南竄股匪追過河東其北竄股匪並續經渡

河之賊已竄至南宮冀州之間一摺河西軍務竟屬毫無布置劉長佑到營後著將馬步各軍迅速調度確探賊蹤究有幾股督率進剿嚴扼北路之防其竄徧豫境賊股諒卽徐廷楷所跟追之由西南竄逸一股仍卽飭令該總兵實力追擊與豫省之軍會合兜剿僧格林沁素顧大局著卽趕緊北上沿途偵探何路緊急卽向何路追剿邱縣之賊又已竄渡河西應令山東省如何聯絡堵截之處並著僧格林沁劉長佑等隨時咨會譚廷襄併力辦理將此由六百里各諭令知之○諭嚴樹森奏親赴下游查閱營壘並豫捻竄擾光山鄂北喫重各摺片前因皖北軍情喫緊已令嚴樹森暫緩興漢之行見據該撫奏稱忠逆大股由九洑洲陸續渡江一竄六合等處一竄和含擄糧之賊已至廬州之柘皋店埠一帶又據探稱李世忠駐防九洑洲營壘被陷見在該逆圍攻江浦橋林

圖撲西梁裕溪再犯無廬等語與前日曾國藩所奏情形大略相同皖北舒廬潛太一帶處處空虚鄂防甚關緊要該撫已於二月二十四日起程親赴黃州府屬之上巴河查閱前敵營壘卽著妥爲布置飭令駐紮之穆正春王桐柏等督率各軍嚴密防範無稍疏虞並一面知照李續宜迅速起程赴皖相機防剿毋再延誤湖北武關鄉試主考事宜卽著官文入關辦理至陳大澐句合毫捻南竄本日據張之萬等奏到該逆在光山縣境經余際昌連日督軍馳剿擒斬約以千計見已竄至麻城縣境期會楚師前後夾擊等情此股逆匪行蹤飄忽來往楚豫之交已成熟徑若得楚軍邀其前豫軍蹙其後敗殘之匪何難一網殲除本日已諭張之萬飭令余際昌一軍越境追剿並著官文嚴樹森督飭駐紮麻城之總兵楊朝林督率防兵前後夾擊如兵力不敷卽著速行添調馳往

協勦務將此股賊匪就地殲除免致蔓延腹地嚴樹森俟下游布置稍定卽著取道麻城一帶將會勦事宜妥爲籌辦毋誤事機其姜台凌一犯業經僧格林沁生擒正法該撫所稱與陳大澐合股之毫捻姜台凌是否另股託名並著偵探明確實力勦辦將此由六百里各諭令知之○吳棠奏查譚廷襄所稱黃國瑞一軍當令赴兗進勦先由費縣攻克寶泉嶺後卽由鳳凰山東南紮營與兗軍西北會合夾擊教匪一經破滅則蘭費餘匪均當瓦解等語所籌自係東軍勦匪之要策但黃國瑞一軍所以由郊蘭進者原因郊蘭地方界連江境既可顧邳宿後路並可策應海賴沐陽不使東匪乘虛闖入江境也臣部兵力祇有此數黃國瑞入東會勦曾撥帶兵勇二千餘名嗣因長城未下陸續添撥至三千餘名究嫌單薄見在蘭費圩匪尙多該處山路崎嶇又係積年藏奸之藪若

令遽赴兗州不惟黃國瑞懸軍賊中腹背受敵尤慮沂蘭羣盜伺
間南擾海嶺地方一時策應不及且郟境新撫各圩官軍一去勢
又被偏從賊是數月來苦戰之功仍同虛擲據黃國瑞稟稱郟蘭
境之龍沂圩西作圩賈莊圩臥牛山圩長新橋圩紛紛來營投誠
惟蘭境宋姓之中村圩前有巨匪孫化詳等襲踞該逆刁悍非常
負隅抗拒見聞已旬結外匪來援必得攻拔中村則蘭山西南鄉
可以肅清而由邳州至沂州始可無阻等語臣已飭黃國瑞迅速
督師攻剿中村圩匪並俟徐宿防軍抽撥到營兵力稍厚先將蘭
費圩匪節節剪除再行會合東軍北征兗屬匪股似立腳較穩可
收得尺得寸之效 上諭宿州永亳一帶雖經肅清惟徐宿地方
界連四省民風素稱強悍自應酌留隊伍以資彈壓吳棠見擬留
馬步三千名派副將姚廣武統帶往來徐宿照舊巡防著卽照所

議辦理髮逆渡江甚眾淮揚一帶防務喫緊該署漕督已令黃開榜酌帶所部折回高郵以重湖防務當慎重防維毋稍大意沂蘭一帶與海賴地方毗連非將該處匪圩掃除淨盡則江南連界地方勢難靜謐吳棠見擬於徐宿軍內抽撥往助並交黃國瑞統帶攻剿中村先將蘭費圩匪節節剪除再行會合山東兵勇攻剿克屬昨譚廷襄亦奏稱擬令黃國瑞進攻中村曾經諭令該前撫督飭黃國瑞速將該圩克復以次進攻梁邱寶泉崗及鳳凰山賊巢並著吳棠卽飭黃國瑞節節掃蕩迅速殲除惟江北情勢甚喫重黃國瑞一軍應紮淮沂一帶交界地方不可深入東境恐致腹背受敵且與清淮相距日遠勢難兼顧有人奏請停止江北畝捐一摺江北畝捐前據吳棠奏稱勢難驟停惟所收捐項總須覈實開銷該署督於收捐動用數目何以並不報明一味顛預致令戶

部無從稽考著卽速行造冊報部其釐捐等項收發數目亦著一併詳細造報以憑稽覈毋稍遲延干咎其勒捐追比及帶勇威脅之地方官並著嚴行查參原摺著鈔給閱看將此由五百里諭令知之○諭張亮基奏苗教各匪竄擾遵義桐梓督兵進剿擬由間道赴黔一摺張亮基由川赴黔行至松坎探聞白號教匪及苗匪圍攻桐梓縣城分踞元田壩等處由遵義進省之賴板礮等處亦有黃號教匪紮營阻道該前督飭楊發貴等帶兵一千名率桐梓各團練丁數千人並調副將張開友分路攻剿且戰且進如剿辦需時擬由間道赴省所籌尙屬妥協著卽督飭楊發貴等激勵團勇奮力進剿務將驛路節節疏通取道前進貴州地方緊要韓超一籌莫展張亮基必須迅赴省城接署撫篆將交查交辦各案妥速籌辦以副委任如桐梓等處賊勢過眾暫時不能辦結卽由小

路探蹤前進毋稍遲誤勞崇光見已行抵何處曾否到省連日未曾得其奏報並著張亮基探明馳奏將此由六百里諭令知之○庚戌諭議政王軍機大臣等瑞麟奏請開墾圍場閒地以資接濟並繪圖呈覽一招熱河駐防旗兵所需俸餉因庫款支絀未能按月支放眾兵時虞困乏自係實在情形所籌招佃展墾荒地以濟兵食自屬可行著照該都統所擬將圍場四面邊界荒地八千餘頃展出開墾其押荒升課章程卽著妥議具奏但事當創始必須妥籌盡善方可有利無弊尤須不避嫌怨認真興辦所有此項荒地著招募家計殷實素業稼穡之人具呈認墾不准濫招無業游民致滋流弊尤須畫清界址不准越墾以息爭端其與民地毗連者並當禁止侵占方可日久相安紅椿以外前墾兵租地畝歷年較久越墾成熟之地竟至數百頃之多著勘定界限安設卡倫以

杜侵越之弊圖內所指伊親王地係何頃地畝於此次開墾荒地有無妨礙並著查明具奏圖畱覽將此諭令知之尋奏遵查正黃旗西北邊界有怡親王荒地草廠與此次開墾並無妨礙至所指伊親王係前次傳聞之誤報聞○諭譚廷襄奏河西敗匪回竄截剿獲勝一摺前因東匪疊次西竄譚廷襄一軍總未能豫爲攔截諭令嚴督所屬實力兜剿並因該前撫奏報情形與崇厚所奏殊多歧異復諭令確加偵探不許枝梧搪塞此次西竄股匪雖經恆齡擊退回竄河東惟據崇厚奏大股東匪陸續渡河已竄至南宮冀州之間是賊勢並未少挫乃本日譚廷襄摺內僅據保德等稟詞輒稱河西敗賊疊被官軍痛剿或全股殲滅或分路逃匿勢極窮蹙等語該前撫帶兵日久於軍情賊勢並不畱心籌辦於竄往直隸之股匪亦置之不議但憑稟報之詞鋪敘零星斬獲以自了

門面無怪乎迄無成功也嗣後務當嚴督所屬實力偵探遇有回竄賊匪嚴飭各軍痛加剿洗截其西竄之路儻敢仍前疲玩賊去則以鄰爲壑賊回則捏報勝仗致誤戎機惟譚廷襄是問將此由六百里諭令知之○諭前因進剿信宜縣陳逆之卓興等軍不可無大員統率諭令崑壽馳赴高州督率卓興方耀兩軍剋日殲除陳逆該提督接奉前旨計已出省督剿著卽嚴飭在事將弁奮勇前進務將積年巨憝一鼓殄除毋稍遷延致滋蔓前據劉長佑奏新甯縣東西兩路客家勾結匪類焚掠廣海寨嗣據晏端書奏土客之禍始於肇屬恩平見在縱橫八九縣焚殺不已等語該土客居民仇讐已深必須懾以兵威方可逐漸解散劉長佑前派臬司吳昌壽副將衛佐邦帶勇數千前赴新甯妥辦著卽責成該臬司等分別良莠持平辦理如敢恃眾抗拒無論爲土爲客卽督兵

進剿大加懲創俾兇頑知所做畏被脅良民可以聞風解散休致
臬司張敬修籍隸廣東東莞該縣鄉勇素稱强悍著晏端書黃贊
湯檄令該臬司迅卽調集本縣鄉勇數百名相機援應以助官軍
所不逮粵東本富庶之區籌解庫儲接濟他省軍餉均關緊要若
高州賊匪及肇廣土客互鬪之案不能迅圖辦結將征剿靡有已
時餉需必致匱乏晏端書黃贊湯身膺重寄均屬責無旁貸務當
通盤籌畫實力整頓任用敢戰之將俾該省軍務日有起色殲除
醜類綏靖海疆方爲不負委任將此由六百里各諭令知之○王
子諭議政王軍機大臣等劉長佑奏在途接印日期及見在剿辦
大槩情形一摺劉長佑於三月初三日在衡水地方接印任事恆
齡等軍據報擊賊獲勝見追至束鹿所屬之智邱村該督擬一面
激勵將士速籌兜剿一面馳赴威縣軍營察看地勢賊情並卽酌

帶馬步小隊會督勦辦所籌甚是著卽照所議妥爲部署如賊匪分股狂竄當豫計匪竄之路調派各軍暗爲兜勦並飭令王榕吉督率鄉團嚴密防勦毋任再有紛竄其劉策先余承恩等如果尙能得力亦須授以機宜洋槍隊及鄉團素稱得力宜設法策勵調遣至賊匪股數有幾每股若干人數其由某處竄至某處者股匪係何人爲首均著詳細查明具奏寶山所帶之兵與直隸各軍均歸劉長佑節制該督其申明軍律殄茲羣醜綏靖畿疆以副委任將此由五百里諭令知之○癸丑諭內閣都察院奏奉天生員秦福慶以堂叔胞弟殉難請卹並懇投效等詞赴該衙門呈訴前因署直隸大順廣道秦聚奎在桑阿鎮地方勦賊陣亡當經降旨優卹茲據該故員堂姪秦福慶呈稱該故員死事情形受傷甚慘並伊胞弟六品軍功生員秦福泰隨同秦聚奎勦賊被賊砍剝同時

殉難陣亡兵勇家人等一百餘名等語秦福泰等同仇殺賊力竭捐軀洵屬深明大義殊堪憫惻著劉長佑將秦聚奎死事情形再行詳查及軍功秦福泰等同時陣亡各情一併查明奏請議卹至該生秦福慶因堂叔胞弟均被賊害呈請投效軍營剿賊復讎自屬激於義憤秦福慶著卽准其前赴劉長佑軍營效力剿賊○諭議政王軍機大臣等本日據都察院奏奉天生員秦福慶以殉難請卹投效復讎等詞赴該衙門具訴本日已明降諭旨令劉長佑查明秦福泰陣亡情形具奏請卹並准令秦福慶投效直隸軍營矣前署大順廣道秦聚奎督帶兵勇追剿張錫珠股匪在桑阿鎮地方力戰陣亡前已有旨將該員交部照道員陣亡例從優議卹見據秦聚奎之姪秦福慶呈稱當時隨同陣亡者尙有隨員蒯遐齡蔡玉麟及伊胞弟秦福泰並兵勇家人驃手等共有一百三四

十名又總兵伊縣阿帶兵一千名於秦聚奎被賊圍困時相去三四里並不援救等語著劉長佑將秦聚奎死事情形再行詳查其秦福泰及隨員蒯遐齡等並兵勇家人驃手等陣亡姓名一併查明速行奏卹以慰忠魂至地方文武會辦剿捕事宜往往文員帶兵前進而將弁反擁兵在後觀望不前以致失事深堪痛恨並著劉長佑將伊縣阿擁兵不救情形嚴切查明據實奏請懲辦以肅軍律毋稍徇隱至桑阿鎮係賊匪老巢前於秦聚奎帶兵剿捕時童穉婦女皆執木掀埽揚土助賊聲勢非痛加剿洗不足以儆兇頑而正人心著劉長佑確切查明如果屬實卽行派兵力加埽除以靖逆氛而除後患原呈一件著鈔給閱看秦福慶投效軍營能否得力並著劉長佑隨時察看酌量去畱可也前因王恩第通賊疊經諭令文煜崇厚訊明正法嗣據崇厚奏稱王恩第所部人

數甚眾未便輕動請暫緩正法等語王恩第甘心從逆罪不容誅豈可令其倖逃法網崇厚人本怯懦閱歷又淺恐其中存畏憚該督久歷戎行自能將此案密速籌辦著仍遵疊寄文煜崇厚諭旨將王恩第通賊之事訪查明確斟酌辦理該督務當不動聲色密益加密毋得稍有漏泄致誤機宜知縣李鴻垣把持營務諱敗爲勝濫收降眾殺害良民大名鎮標官兵滋事冀州牧丁學易雖經崇厚奏參尙有應查之款署冀州牧裴姓亦有被參各款均經諭令交文煜崇厚查辦未據覆奏均著劉長佑秉公分別遵照前奉諭旨次第查辦迅速具奏此外寄諭文煜崇厚查辦各案著一併檢查原卷次第奏結宋憬詩狼子野心反覆無常實屬意中之事劉長佑務當時時嚴防妥爲駕馭不可稍涉大意將此密諭知之

○曾國藩奏

臣

行抵金陵後於二月十五日由大勝關赴九洑洲

該處江路狹隘與南岸草鞵峽列壘對峙次日回舟西上入金柱關小河查閱龍山橋三汊河查家灣等處十九至二十六等日由東西梁山入裕溪口小河查閱雍家鎮運漕石澗埠無爲州等處二十三日由神塘河出江見在舟抵大通不日即可旋省北岸之賊十六日續陷江浦縣城新河口營壘迤邐西竄徘徊於巢含全椒之間未遽深入其僞忠王蹤迹據李鴻章函稱該酋因浙東肅清調集羣賊併守杭省而自留蘇州未出據蕭慶衍稟稱該逆實已北渡於十三日入巢縣城各路生擒賊供僞天王令忠酋力攻西梁無爲州圖取廬州和州之米令侍酋力攻蕪湖金柱關圖取甯國太平之米欲還昔歲之舊觀以保金陵之巢穴各等語逆謀詭祕無從測度臣所調劉連捷三營已到石澗埠與毛有銘其紮十一營地勢寬曠尙嫌兵單此外西梁運漕無爲廬州等處亦僅

力能自固非俟李續宜江忠義到皖難以輕進南岸自甯國屢捷後惟金柱關侍逆一股爭戰不休初一至十六等日連次猛撲查家灣該逆雖大受懲創我軍亦疊有傷亡正擬令鮑超攻取金寶圩進剿東壩以固皖南之藩籬而鈔侍逆之後路乃徽州青陽兩處連日警報頻至石埭之賊黃汶金古澧賢等併犯青陽太平之賊分竄徽州各嶺又有花旗譚星兩股由浙江敗回廬集徽境初三日唐義訓擊退歙南一路其東北兩路愈來愈眾繞過郡城之西十五日唐義訓帶隊出剿頗有撿斬而別股從黃山南來猛撲休甯縣城唐義訓以休城僅畱三營不敷守禦添派王華雲一營入城協守至祁黟一帶王文瑞擊退竄擾石坑南湖之賊其大洪禾戌等嶺時有逆蹤窺伺防不勝防臣本擬令朱品隆同援徽州因青陽喫緊該軍不能抽動不得已令鮑超暫緩東壩之行先從

南陵馳救青陽以解目前之急左宗棠肅清浙東卽慮敗逆回竄
皖南亦派劉典一軍援應徽州羣逆皆窮餓之餘無巢可歸蓄意
闌入善地就食江西若徽甯青陽等城倖得保全該逆或由祁西
以竄饒景或由歙南以竄婺源均爲江西北邊之患臣時時兢惕
並函告沈葆楨豫爲防範合力維持又奏臣巡閱諸軍詳觀賊勢
攬南北之形勝察天人之徵應竊以爲有可懼者數端而可喜者
亦有數端自池州以下兩岸難民皆避居江心洲渚之上編葦緝
茅棚高三尺壯者被擄老幼相攜草根掘盡則食其所親之肉風
雨悲號死亡枕藉二月十五日大勝關江濱失火茅棚數千頃刻
灰燼哭聲震野苦求賑恤他處蘆棚叢雜亦往往一炬萬命徽池
甯國等屬黃茅白骨或竟日不達一人又聞蘇浙之田多未耕種
羣賊無所得食故壹意圖竄江西並窺伺皖浙已復之區貧民無

所得食弱者轉徙溝壑黠者則從賊以偷生旦夕黨與無定長酋
長無定謀誠恐變爲流賊更難收拾而諸僞王中如李侍賢失金
華楊輔青失甯國黃汶金失蕪湖古澧賢失青陽劉官方失池州
巢穴雖破醜類尙多其意怏怏不甚服僞天王僞忠王之調度其
行徑亦與流賊相近恐其竄入裏下河以據場鹽之利此皆可懼
之端也粵匪初興竊有條理頗能禁止姦淫以安裏脅之眾聽其
耕種以安占踞之地民間耕穫與賊各分其半取江南數郡之糧
運出金柱關取江北數郡之糧運出裕溪口並輸金陵和春等雖
合圍城外而賊匪仍擅長江之利挹不竭之源傍江人民亦且安
之若素今則民間賊至痛恨惟心男婦逃避煙火斷絕賊行無人
之境猶魚處無水之地必窮之道豈有能久之理而東南要隘如
安慶蕪湖廬州甯國東西梁山金柱關裕溪口暨浙之金華紹興

此皆山川筋脈必爭之地但求此數處不至再失終足以制該逆之死命昔年粵賊所至築壘如城掘濠如川堅深無匹近亦日就草率而官軍修壘濬濠今實遠勝於昔賊中羣酋受封至九十餘王之多各爭雄長苦樂不均敗不相救而官軍仰承 聖謨三江兩湖水陸各營頗能和衷共濟呼應靈通至百姓仰戴 皇仁淪肌浹髓雖 臣等撫綏無術治軍無效斯民久陷水火之中曾不一聞怨咨之語翹首而望平寇擊壤而謳吾 君意者民心所在天佑孔長凡此皆可喜之端也夫竊號巨股變爲流賊昔 文宗顯皇帝常慮及之但冀金陵蘇杭三處有一二克復卽當大赦羣酋廣爲招撫以庶幾赤眉百萬同日納降之盛軌 上諭逆賊續陷江浦縣城新河口營壘池邏西竄巢含全椒之間九洑洲逆壘尙未攻克賊蹤紛竄江北時切隱憂逆情詭祕不可不防至金柱關

徽州青陽休甯紛紛告警該大臣已令鮑超等軍分道馳援著卽與左宗棠所派劉典之軍會合攻剿保全徽境並與江省隨時聯絡以杜賊黨竄越之路其劉連捷毛有銘等營分紮地面甚寬務與西梁山運漕鎮及無爲廬州竭力固守俟李續宜江忠義到皖兵力較充再行相機進取至池州兩岸及西梁山大勝關等處難民編葦而棲析骸以食死亡灰燼之餘不堪目擊等情閱之殊深憫惻如有可爲倡率捐賑之處卽著該大臣酌量辦理以甦殘喘其賊中乏食及羣酋漸不相能勢將變爲流賊更難收拾若無撫綏安定之方終是不了之局此時惟有將皖南北已克各要地嚴密守備毋令復爲賊有仍俟李續宜江忠義到皖再圖節節進取至所稱逆賊日將渙散其如何招撫之處該大臣諒已早有辦法刻下賊勢旣形渙散卽可乘機辦理不必待金陵克復以後饒景

婺源賊蹤必將竄擾該大臣已知照沈葆楨豫爲防範諒該撫必能以全力共維危局惟裏下河一帶係江北膏腴賊所垂涎疊經諭令都興阿富明阿吳棠竭力防維諒能不至疏懈該大臣如有所見仍著飛速知照都興阿等俾得先事綢繆保全完善李世忠失陷江浦後自往五河並不回顧其桀驁情形終難相安無事該大臣既知其部卒疑貳激變亦不足慮業將革畱諭旨宣示俟李續宜等軍合攻江浦其應如何嚴參懲究之處惟在該大臣相機辦理此間不爲遙制本日都察院奏道員吳文錫遣抱告以應詔陳言等詞赴該衙門呈訴披閱所陳大旨在請辦鹽餉以濟軍需減釐捐以蘇民困卽著曾國藩將該道員所陳得失利弊詳細酌覈是否可行奏明辦理原呈著鈔給閱看將此由六百里各諭令知之○予江蘇陣亡副將王友勝等祭葬世職○予安徽殉難知

縣唐治建祠巡檢鍾普塘附祀○甲寅諭議政王軍機大臣等前
因多隆阿於攻克王閣村羌白鎮後患病請假半月當經降旨寬
予假期以示優眷迄今已近兩旬該大臣自當乘得勝之機攻克
倉頭鎮肅清東路以顧西安以西而至今並無捷報殊深懸盼見
在倉頭鎮何日可以攻克自西安以達潼關大道已否疏通西安
防守情形如何雷正綰病體已否痊愈是否前赴盩鄠追剿曹逆
抑赴鳳翔援救鳳郡情形能否稍鬆副將王夢麟能否得力咸陽
一帶軍情若何髮逆由漢陰石泉西竄究在何處固原失守以後
回情是否猖獗瑛瑛形同木偶無足深責該大臣身任統帥全省
均歸統轄朝廷宵旰焦勞日昃不遑體諒臣工無日不以爲念而
該大臣感激知遇自當力圖埽蕩豈得稍自暇逸或與在事文武
稍存忌克之心不能和衷共濟以致軍務不能迅速戡事殊非朝

廷委任之意著多隆阿將近日進兵情形並垂詢各情詳悉覆奏以慰廑念聞王閣村羌白鎮克復時於地窖中挖掘銀三百餘萬兩黃金六萬兩朝廷惟以拯民水火爲急原可置之不問第此項銀兩若不分給有功將弁兵丁則無以鼓其奮勇之氣而該兵丁挾此重賞恐意存已滿不肯力戰或紛紛挾賞告假回籍大非朝廷優待勇丁之意並著該大臣據實具奏毋稍隱飾將此由六百里諭令知之○諭熙麟奏馳抵慶陽察看回勢瀝陳籌辦情形並設法安置塘汛密遠運餉各摺片熙麟行抵慶陽本擬進攻固原而瓦亭峽等險隘悉爲賊踞熙麟僅帶黃得魁等數百兵勇勢難冒險前進該督因奉有解散協從諭旨遂擬作定勝二說講解一篇一併張貼曉諭予限四十日令各處回眾一律輸誠值此進退維谷之際權宜辦理亦是應變之法惟該回未受懲創恐非虛聲

所能懾服且轉瞬限期將屆萬一該回負隅如故而各路援兵未集我軍虛實爲賊所知則情見勢絀更難措手熙麟前調延綏鎮兵一千名見在已否到齊歸化城兵計已起程著該督迅催前進並飛調各路援兵齊會慶陽相機進剿攻破瓦亭峽口以通大路庶可迅復固原不至日久延蔓至平涼府城既未被圍回蹤見在麇集何處其平涼收存協餉既擬陸續運回慶郡總當督飭地方官弁嚴密運送毋齎賊糧熙麟摺內所稱王大桂已稱僞號是否卽係前次投誠之人至降賊知州馬文偉開門迎賊實堪痛恨其納姓回子是否卽係納清泰等一股並著查明覆奏甘省兵單餉絀而同種之繁十倍他省該督見在辦理苦衷朝廷自能洞悉該督惟當通盤籌畫計出萬全以副委任將此由六百里諭令知之

○諭沈葆楨奏法國傳教士羅安富到潯見飭九江道將應給該

教士賠款五千兩就近提銀交付其吳城地基亦由該道轉飭該同知遵照辦理惟據南昌縣呈驗通衢揭帖有四維不日來省商集照前議行事等語羅安富上年到京經總理各國事務衙門再三開導令其暫緩回江該教士堅執不從止得准其前去復諭令官文於該教士到漢口時設法挽留該教士並未謁見官文見已由湖北護送到潯是其急欲晉省已可槩見沈葆楨令九江道付給賠款吳城同知照給地基若該教士聞知省城物議紛騰自知慎重不復赴省該撫自可相機辦理如果執意前來沈葆楨務當遵照和約熟籌妥辦揣該教士晉省之意無非欲謁見大吏以爲體面遇有與地方士民交涉事件隨時可以稟明剖斷該教士如果安分傳教該省士民亦何必無故尋釁致滋事端如該教士藉傳教爲名陰行不法或干預地方公事該撫卽據實咨明總理各

國事務衙門會同該國公使懲辦總之與外國交涉事件一切須持平辦理該撫斷不可稍存成見致有偏抑務使中外相安爲要沈葆楨奏逆匪圖犯江境嚴飭各軍扼守以杜竄越等語昨據曾國藩奏浙東之匪無巢可歸蓄意就食江西該大臣業經函致該撫豫爲防範卽著速飭各路帶兵員弁認真扼截毋令闌入善地撫郡爲饒廣後路聲援且係省垣門戶最關緊要該撫仍當妥爲布置以備不虞毋專恃景鎮饒防致有疏失將此由六百里諭令知之○乙卯諭議政王軍機大臣等瑛榮等奏詳報省城一帶情形匪撲藍田擊退派員馳赴鳳翔防剿並漢陰石泉解圍後髮逆合股西竄漢中喫緊各摺片逆匪四僞王由石漢西竄距漢中府城僅三十里城固被圍甚急川匪藍大順與該逆勾通一氣見在毛震壽駐紮城固分飭盧又熊專顧漢中惟隘口紛歧兵力單薄

該逆全注漢郡設有疏虞剿辦又覺棘手多隆阿雷正綰各軍均因攻剿回巢勢難兼顧是陝南軍情十分緊迫前經寄諭官文等飭令李雲麟會同梁作楫督率防守鄖西二竹之兵越境追剿此時鄖屬已無賊蹤豈可藉防賊回竄爲辭株守楚境且此股髮逆本係由楚入秦更不得以驅賊出境遂可以塞責了事嚴樹森見因察看下游營壘不克督兵西上卽著官文等嚴飭梁作楫李雲麟等剋日督率所部馳赴漢中相機進剿儻該員弁意存畛域玩愒不前則是以鄰爲壑該員等其能當此重咎耶周達武一軍前據駱秉章奏稱見駐渠縣策應保甯綏定第漢中不靖蜀境亦難安堵自應先其所急廓清邊患著駱秉章速飭周達武星馳赴陝會同漢南各軍併力剿洗俾川陝楚三省邊陲永除後患官文駱秉章等務當力顧大局毋稍推諉貽誤事機伊昌阿行抵南田回

匪率眾來撲經該副都統督率各軍固守遊擊陳德隆等督勇接
仗將賊壓退此項楚勇一千三百名卽著畱守藍田以通文報往
來之路王夢麟前往鳳郡被回匪設計截殺不克前進實屬怯懦
無能仍著瑛棨嚴飭該副將迅赴鳳郡毋任逗畱多隆阿進取回
巢自應以肅清東路爲要但該大臣係督辦全陝軍務省垣爲根
本重地豈可不思兼顧仍當調派數營前往援應疏通餉道遏截
逆氛毋稍大意雷正綰病已痊愈卽著多隆阿遵照前旨檄飭該
提督迅赴鳳翔以拯危急省垣附近一帶回匪出沒靡常穆騰阿
務當會同瑛棨馬德昭隨時派兵出剿毋令該匪來去自如益形
猖獗瑛棨奏陝省軍需孔急見派在籍湖北候補知州趙晏清赴
楚勸捐等語陝商在鄂省者較川省爲多瑛棨擬倣照在川陝商
一體捐輸自屬可行卽著飭令趙晏清妥爲辦理如有須地方官

幫同勸導之處並著官文等委派妥員會同辦理前據駱秉章奏
盧又熊移營進偏斗山被賊將營盤燒毀此事未據瑛榮陳奏本
日瑛榮摺稱令其帶領所部專顧漢中是否得力著多隆阿駱秉
章瑛榮查明具奏前命張亮基署理黔撫此旨令張亮基於到黔
後宣示何以韓超遽得聞知是否川省於行文黔省時未經檢點
竟行直書新銜外省於此等要件往往不知慎密致生枝節著駱
秉章查明覆奏將此由六百里各諭令知之○諭據駱秉章韓超
先後馳奏雲南省城失陷一摺覽奏曷勝憤懣此時雲南全省糜
爛惟川東昭通尙未被回匪占踞該郡與川黔毗連若分道進剿
自是正辦而川黔軍務未靖兵餉兩絀恐亦徒託空言惟有力守
東昭防其西竄並於川滇接壤處所一體嚴防畱爲他日進兵地
步韓超已派李有恆帶兵馳赴東昭援剿而兵力仍恐不厚並著

駱秉章酌派官軍一併馳往協同防守不准稍涉疏虞致令滋蔓
廣南與粵西接壤著張凱嵩一體防範毋任竄越賈洪詔等尙在
川省著駱秉章卽行知照飭令迅赴東昭協同防剿以繫人心不
得任意逗畱川境致干重咎到任後卽將滇省一切情形迅速陳
奏駱秉章摺內所稱逆回馬榮是否卽係馬如龍滇省文武下落
究竟若何督撫司道等死難情形均著一併詳查具奏張亮基諒
已早抵黔省勞崇光亦將次可到卽著會商妥籌堵禦毋得稍涉
推諉韓超另片奏因病請假並請飭催張亮基到省接印等語韓
超以道員擢署巡撫受恩優渥豈得以接署有人輒思諉卸著傳
旨申飭張亮基未到以前韓超於一切應辦事宜仍著認真辦理
不得存五日京兆之心將此由六百里各諭令知之○諭韓超奏
回匪占踞雲南省城並圖窺伺東昭兩郡必須竭力保全方有進

兵之路韓超見派李有恆統帶所部由東川昭通一路進剿惟黔
省餉項久絀軍需萬難措手見當防剿在在喫緊一應軍裝口糧
不可不寬爲籌備著賚秉章晏端書黃贊湯毛鴻賓沈葆楨各將
欠解黔餉每月撥解四五萬兩以濟要需該督撫等務當顧全大
局先其所急按月如數解往毋稍延誤將此由六百里各諭令知
之○以賈洪詔爲雲南巡撫

由前任布政使遷

林鴻年爲雲南按察使

由臨

安府知府遷

○丙辰李鴻章奏自鼎字等營紮定福山左右與賊營相

對常勝軍亦駛抵福山二月初五至十五等日更番輪擊疊有斬
擒維時接帶常勝軍之英兵官戈登馳抵福山上岸徧察形勢十
七日編修劉秉璋道員潘鼎新會商戈登約定常勝軍以大礮轟
擊賊壘各營專打援賊兼挑奮勇數百人會合常勝軍豫備爬城
次日署提

臣

黃翼升帶各部水師由西路上岸令總兵王東華等

四面列隊並設伏於西山之內常勝軍出隊以西洋大礮安架福山舊城門上小礮分列其旁令呂宋兵乘坐小船駛近賊壘搭架浮橋各營奮勇伏於舊城牆下自己至午連放開花炸彈擊倒港東賊壘數尺副將張遇春揮令各營奮勇外國兵官揮令常勝軍擁至港邊賊猶憑牆開放槍礮我軍渡過浮橋由倒牆缺處而進賊尙抵死抗拒我軍刀砍矛刺盡數殲之港西賊營猶未肯退有字營衝撲數次各營奮勇暨常勝軍一齊擁上賊始逃竄當我軍攻壘之際謝家橋等處賊營數十座同時出隊來援約四五萬人黃翼升等各率兵勇分路搏戰併力奮擊賊爲披靡當將福山石城收復是夜各營復選精銳潛襲大義橋謝家橋賊壘齊聲吶喊賊於昏黑驚遽中不知我軍多少棄營狂奔我軍節節掃蕩踏毀沿途賊營數十座先是圍城之賊多赴福山周興隆駱國忠等商

派奮勇千人分由四門殺出連日鏖戰踏毀該逆附城營卡二十餘座十九日曠見賊眾退入西山一路福山火起知我援軍獲勝當卽派隊迎會福山得勝之師前後追剿董正明驍勇過人生擒逆首哮天義朱衣點一名餘逆斬獲甚多奪獲賊船數十隻城圍立解臣查常昭投誠雖久崐太兩路未通福山各口又被援賊占踞匪眾十餘萬圍攻七十餘晝夜無論智愚皆料其必難自存臣不忍負降人死中求生之意太倉堅城旣屢攻不下因抽調水陸各營航海繞赴福山竭力援剿而眾寡懸殊後無接應形同孤注所幸眾志成城拌死守禦海口援軍出奇入險助以西人礮彈遂得掃除逆壘打通後路以解常昭之圍實非臣初念所及見派劉銘傳督帶銘字各營會同知府張樹聲等各營分紮福山港口並咨商黃翼升酌畱水師三營與城內外陸軍相依防守一面檄調

潘鼎新一軍迅回金山衛以防浙西竄賊臣查黃翼升自去夏督

師來滬無戰不與指揮布置備歷艱險實屬忠勤耐勞爲近日提

鎮中不可多得之人才王東華各員亦皆以福山危險之舉引爲

己任竟能由險入深以寡敵眾會合諸軍解此重圍臣不敢不擇

尤開列先行奏懇恩施以示鼓勵又奏英國兵官戈登甫經接帶

常勝軍經臣以常昭圍急福山兵單諭令往助該兵官卽帶隊馳

往與諸將士和衷籌商併力攻克往來臣營稟商調度情詞恭順

亟思四出攻剿迅掃巢穴又以常勝軍習氣太壞欲漸漸約束裁

制其志趣實爲可嘉戈登旣爲中國帶兵似應循照成案請旨暫

假以中國總兵職任以便臣等節制調遣俟其事竣回國再請撤

銷又奏駱國忠忒拔羣董正勤等數人於四面賊區之中雜髮獻

城該城獻出五日蘇常大股卽來圍攻反側危疑變在旦夕臣不

得不從權給予二三品頂戴並許解圍後破格保獎既而該城危急日甚董正勤被礮傷陣亡城外營壘盡失幾至不守臣又派都司劉增壽齎帛書閒道入城恭傳恩旨宣布嘉獎降眾感頌再生各以死報駱國忠等忠誠不二奮勇絕倫血戰苦守兩月有餘殲斃爬城及穿地道悍賊不知凡幾保全斯土以待援師實非尋常降將可比遊擊周興隆單騎奮入勸眾歸心督同守禦致受礮石重傷左目已眇亦非尋常勞績可比可否懇恩將駱國忠等破格獎勵之處出自 鴻施其餘出力各員弁及隨同投誠各頭目容臣詳細查明擇尤彙保見在賊氛雖退而崑太未復常昭與松漚中多阻隔該城距蘇僅九十里防堵緊要仍令周興隆駱國忠等督眾堅守俟大軍前進再行酌覈辦理 上諭議政王軍機大臣等常昭被圍日久降將駱國忠等竭力固守經李鴻章調派水陸

各軍援救先將福山口要隘克復該降眾亦奮勇出擊遂解常昭之圍辦理甚爲得手本日已明降諭旨照所請給予獎勵矣戈登接帶常勝軍奮勇明白此次復力克福山著卽授以中國總兵職任仍著李鴻章傳旨嘉獎常勝軍積習太壞並責令戈登嚴加約束以期消患未萌駱國忠等請獎副將翎支等職未免過優惟念該降眾等自拔來歸後血戰苦守兩月有餘力保孤城非尋常降眾可比且該撫已許其破格優保若不俯如所請無以示信義而勸將來著李鴻章將明發諭旨宣示駱國忠等並責令仍駐守常昭將附近一帶賊營掃蕩俾知格外感奮不可因賊氛稍遠稍涉大意此後投誠之人仍宜漸次保升免貽諸將口實且恐此輩驟膺顯秩志得意滿不復勉圖上進不可不示以限制崑山太倉必須攻克方可聯爲一氣著卽激勵諸軍乘勝攻拔爲先發制人之

計該撫見飭劉銘傳等紮福山口令黃翼升留三營防守調潘鼎新回金山衛以防浙西所籌均尙周妥卽督令該員弁等認真防剿福山敗匪竄向何處未據聲明恐其渡江北竄著李鴻章查明具奏仍隨時相機辦理江北隘口處處喫緊疊經諭令都興阿富明阿嚴密布置此時江南得手賊必全注江北尤應自固藩籬方免竄擾完善通州靖江等處口岸甚多著都興阿等督飭水陸各軍晝夜防範毋得稍有疏虞致干重咎將此由六百里各諭令知之○以攻克福山常昭解圍功予參將周興隆以副將用並給勇號降將駱國忠以副將用加總兵銜余拔羣以參將用加副將銜駱國孝以遊擊用胡金元董正明吳超凡駱金榮遊擊銜俱賞花翎餘升敘有差○以李鶴年爲河南按察使由江蘇常鎮通海道遷○丁巳諭內閣景綸等奏生擒首惡解省一摺朝陽匪首葛城慄逃至興

凱湖西南一帶藏匿經佐領瑞徵等飭民夫張義幅等跟蹤追捕
殺斃餘匪四名立將葛城濫擒獲解省卽著景綸等訊明正法仍
飭該官兵等搜捕餘匪以靖地方○諭議政王軍機大臣等景綸
等奏擒獲匪首葛城濫一摺已明降諭旨令將該匪首訊明正法
矣惟此股首匪尙有才寶善在逃未獲豈容日久任其漏網著景
綸卽親提葛城濫嚴行審訊務將才寶善蹤迹究出一面督飭在
事將領嚴密緝拏毋任潛逃致貽後患黑背等處地方餘匪仍著
責成瑞徵搜捕淨盡不得草率了事致令餘燼復燃將此諭令知
之○譚廷襄奏蘭費圩寨疊經官軍剿辦並進攻中村臣嚴飭該
文武等乘此聲威大振一氣掃除旋聞張守義等匪欲行合夥往
援中村復飭黃國瑞豫籌扼擊二月十八日沂州府知府文彬等
督團將西南鄉蒼山幅圍攻克斬匪首于洛三等多名二十六

日黃國瑞派知縣吳炳麒等往攻武得匪圩砍倒賊目夏五並斬
長髮賊三十餘名餘匪翻牆逃逸復追殺數十名乘勝衝入尖頭
匪圩將賊首劉登峨砍斃又斬餘匪數十名立將兩圩克復其附
近之柳莊等圩畏懼投誠二十九日援匪張守義等馬賊數千直
撲中村營盤黃國瑞帶隊奮擊斃賊無數圩匪疊次突出均被截
回自辰至申鏖戰五時殲斃執旗賊目一名馬步賊三百餘名生
擒五名正法賊向旗旺二山一帶逃竄我軍晝夜跟追民團亦沿
途攔截斃賊不少匪首孫化青及夥黨三十餘名一同殺斃旋復
會合民團衝開旗山寨門將山內各圩一併平毀賊匪家口盡行
誅戮生擒偽軍師李棕堂一名正法敗匪竄入港溝崖復派吳炳
麒等帶隊馳抵該圩越牆直入將馬步匪一百餘名全行殲戮奪
獲槍礮旗械多件又派長廣等分攻黎墟賊圩該匪邱春敗竄追

殺多名立將該圩收復又據知縣王殿麟等稟報會同蘭費兩縣帶勇員弁於二十九日在旗山截剿張守義等竄匪擊斃一百餘名次日卽將周家砦趙家砦旗山寺口鳳凰頂八旺寨等圩攻破並同黃國瑞所派副將鄧得勝等殲盡餘匪復將沾化莊光山頭張家塾齊家灣各賊鋪一併剿除旋於三月初一日趁勢攻破旺山將賊巢一律平毀又據王成謙稟報督飭團勇擊斃張守義等竄匪二百餘名斬僞軍師龐姓賊目賈太坤等十三名生擒賊目王中一名立將駝邑信行莊匪巢燒毀該匪等竄回梁邱因見東南各寨多已歸正遂於三月初一日夜將梁邱一帶巢穴自行焚毀向西路竄出經各寨截殺數十名惟曬書臺匪勾通寶泉崗匪及鳳凰山教匪屯踞木頭崖等處仍與我軍相持見復調團助剿又據署運司恩錫等稟報三月初二日探知嶧山踞匪出巢德楞

額等帶領馬步各隊馳至鄒縣七里鋪斃匪二百餘名餘匪敗竄
另有伏賊自界河以西撲至又擊斃二百餘名生擒賈學禮等三
十餘名賊敗回巢初四日張守義等匪馬步數千由梁邱竄至嶧
山初五日直撲中山店一帶旋經我軍擊回臣查旗山匪首孫化
詳襲踞中村被圍窘急令其弟孫化青勾結李城餘黨及張守義
等匪約萬餘人裹糧前往合力與官軍抗拒希圖各保窩巢茲經
擊敗復乘勢進克旗山等處匪首孫化青就戮附近數十里各寨
或勦或撫已可漸次清釐祇餘中村一圩勢成孤立臣當飭黃國
瑞趕緊進攻並令長賡等併力協勦惟沂屬各寨如蘭山之車輞
中村黎墟費縣之旗山旺山最爲著名匪穴其餘半係民團近年
捻幅縱橫疊次偪脅一圩有賊盤踞則各圩悉皆附合其中仍有
良民既不可以全誅亦不可以槩撫見在車輞投誠黎墟收復旗

旺二山攻克中村亦指日可破餘寨自拔來歸幫同殺賊果係真心歸正自當予以自新臣令黃國瑞等將倔强者悉數誅夷投出挑選精銳隨營效力其良善者分別遣散安插責成地方官逐一查察稍有不安本分立即隨地芟除至會匪張守義捻匪李城餘黨均係外來之賊先後遁入梁邱全仗四面匪巢爲之遮護今本地圩寨多已幫助官兵殺賊該匪無可依托焚燒巢穴竄赴嶧山潛與教匪勾聯仍圖負隅自固必須迅將此股撲散庶不至犄角爲患難於收拾是此時東路蘭費地方不久可望肅清而西路兗州彌形喫重惟有催令黃國瑞乘勝早將中村克復移師西進一面由德楞額等及駐兗各軍併力先行勦辦臣已飛飭恩錫迅督各隊進取嶧山嚴扼竄路並催德楞額等趕緊移營赴鄒仍令各路一體嚴防以期無誤全局 上諭譚廷襄奏擊退中村援匪攻

克旗山等寨賊巢分別剿撫蘭費各圩一摺著譚廷襄督飭黃國瑞一軍將中村賊圩趕緊進攻迅圖規取並令長慶等併力協剿以期迅掃逆氛蘭費收撫各圩譚廷襄務當督飭在事員弁妥爲辦理分別遣散安插毋得稍事粉飾致令再生反覆貽患無窮會匪張守義捻匪李城餘黨因無可依託竄赴嶧山勾聯教匪仍圖負固西路兗州甚形喫重該前撫擬令黃國瑞攻克中村後移師進剿兗州教匪前因江北軍情喫緊清淮兵力空虚曾諭令吳棠令黃國瑞駐紮交界地方不可深入東境致與清淮相距日遠勢難兼顧此時兗州教匪著卽嚴飭德楞額等及駐兗各軍剿辦以專責成黃國瑞能否前赴兗州協剿之處著俟攻克中村後再行咨會吳棠相機辦理另片奏總兵曾逢年尙非不能乘騎年力亦未甚衰等語譚廷襄旣因該總兵在東有年情形較熟卽著准其

將曾逢年暫畱淄川會籌防剿迅克堅城如實不能得力仍著卽行撤回將此由六百里諭令知之○諭閭敬銘奏起程赴東日期一招閭敬銘營葬已竣已定三月十二日由臨晉起程赴東著卽探明臨清德州道路星速前進馳赴東昌接署撫篆山東軍務日漸疲玩將領多不得人以致兗沂一帶任賊縱橫日久不能戢事該署撫到任後惟當申明軍律嚴定賞罰務使壁壘一新地方文武咸知遵懷其各路股匪頭緒紛繁尤宜審定機宜先由何路下手以期次第剷除肅清境內該署撫於抵東昌後卽將辦理情形迅速馳奏該署撫其迅速成行勿稍濡滯以慰廑系將此由五百里諭令知之○戊午諭議政王軍機大臣等官文等奏皖豫股匪闖入鄂疆逼近武漢調兵進剿一招此次捻首陳大澹等句合毫捻由羅山新息竄至麻城見竄踞白果鎮該處距黃州甚近官文

等已調派穆正春等移紮舊街沙河等處並調周鳳山舒保等馬步各軍及沿江水師分投巡防辦理均尙周妥該逆陳大澹等入眾雖多而屢經挫敗已失巢穴毫捻亦無巢可歸官文等所調各軍均係鄂省得力之將卽著嚴飭各軍實力兜剿余際昌一軍已至兩路口並著張之萬毛昶熙飭令會同楚軍合力攻剿盡殲醜類此股捻逆久爲豫患豫軍旣未能殲除以致闌入鄂疆同爲兩省邊患自當不分畛域若豫省再不能遏堵復令回竄迄無了期則豫軍之咎更重務當趁此該逆離巢之際與楚軍和衷商酌悉數殲除永除後患官文等亦當同心討賊不得以驅賊出境卽爲了事嚴樹森著俟捻逆剿除後再行酌量情形馳赴上巴河察看軍情此時卽無庸出省其武漢防堵事宜並著官文等妥籌辦理毋稍疏懈將此由六百里各諭令知之○命五城煮賑再展期兩

月○己未僧格林沁國瑞奏太和縣屬朱圩賊匪尙未削平臣等
派翼長舒通額等帶隊往剿復因該逆負嵎抗拒馬隊難以攻取
遂商令臣國瑞帶領翼長蘇克金等督帶馬步隊伍前往進攻二
月二十九日馳抵太和卽督飭在沙河搭造浮橋督隊進剿敗其
圩外伏賊斃匪甚多奪獲槍礮無算因附近之馬家寨情願投誠
初五日督隊前往受降責令立功贖罪並將馬家寨平毀仍督隊
進攻朱圩是日天晴風勁遂令開放炸礮將圩內房屋數百間全
行燒盡圩中人聲鼎沸料難久踞遂派營總西蒙額等帶領馬隊
復於附近村莊並令宋濬沅選帶步勇與馬隊一齊進攻由北門
入賊由南門出竄馬隊繞至南路跟蹤追剿殲賊多名賊眾投入
深溝淹斃不計其數宋濬沅等攻入圩中搜殺數十名當將朱圩
克復其劉家寨賊匪亦於是夜逃竄所有三處賊圩濠牆已飭太

和縣知縣張鍾翰督團一律平毀初六日據陳家寨團總擒獲朱
花子親族朱立東朱小臣二名訊明正法其竄逃餘匪咨行河南
安徽撫臣飭屬一律搜捕以淨根株臣國瑞卽於初八日帶隊回
營朱圩匪眾既殲蒙亳一帶善後事宜臣等已遵旨交署撫臣唐
訓方接辦該署撫見紫蒙城安爲經理並因苗沛霖仍紫蒙城迤
東三十里之雙澗集卽派道員馬新貽赴苗沛霖處查詢據該革
員聲稱定於三月十五日將各處之練散撤爲農三十日將各處
釐卡一併交官等語見在雙澗集之練雖尙未撤該革員已先回
鳳臺縣本寨查苗沛霖如能行踐其言情形尙屬馴順初八日接
准該署撫函稱派營弁及地方官清查圩寨詎有蒙城西鄉之賈
家圩匪首賈汶彬悍不服查其所管五十餘圩皆願歸順因爲賈
汶彬所逼不敢投官當經該署撫派已革總兵普承堯率領兵勇

將該圩攻克斃賊千餘名經此懲創嗣後查辦諸圩更當順手等

情臣等前因該署撫所帶兵勇無多餉項缺乏兼之初抵蒙亳需

用浩繁無法籌措臣等先其所急札飭糧臺撥給餉銀一萬兩以

資接濟查直東賊匪鴟張見在分股齊突一竄臨漳一竄南宮冀

州必須分路剿辦當派翼長蘇克金帶領馬隊千餘名由衛輝府

赴臨漳一帶繞至賊西以便向東截剿臣等帶領舒通額等馬隊

千名兼程取道東昌探明賊蹤繞至北面向南進剿其步隊礮位

令其隨後行走聽候調遣臣等定於初九日分東西兩路同日啟

程妥籌堵剿以遏賊氛上諭議政王軍機大臣等朱圩賊匪業

已殲除蒙亳一帶善後事宜業經僧格林沁交唐訓方接辦該署

撫見紮蒙城卽著妥爲經理其蒙城西鄉之賈家圩亦經唐訓方

督軍攻克所有附近各圩自不難次第清查責令歸地方官鈴束

苗沛霖見因張逆殄滅首惡已除由雙湖退回鳳臺縣本寨有散圍撤卡之約諒不敢以謊言搪塞惟苗沛霖居心叵測儻僧格林沁督師北上該革員故態復萌不將各處之練散撤各處釐卡一併交官則是心懷狡詐終爲後患屆期計李續宜亦已到著唐訓方迅卽與之斟酌機宜隨時辦理朝廷亦不爲遙制直東賊匪奔竄靡定僧格林沁見派蘇克金帶領馬隊由衛輝府赴臨漳一帶繞至賊西著卽飭令該翼長會同豫省派出之楊長春等軍向東截勦力保完善本日據譚廷襄奏捻會各匪竄擾甯陽距省城不及三百里譚廷襄意欲由東昌回顧省城而尙爲張錫珠一股牽掣本日已諭知該撫俟僧格林沁行抵東昌該撫卽可帶兵回顧省城僧格林沁係督辦四省軍務直隸山東各股賊匪應如何分期之處卽由該大臣妥籌辦理宋憬詩不遵多隆阿調遣擅自

回東且一路訛索州縣銀兩擄搶民財前經崇厚等令其添募勇丁千餘人殺賊自效嗣據崇厚等亦奏稱其擁眾觀望並不協助官軍且屢與本地團練爲仇並收用四眼狗死黨數百人雷鳳鳴所部前因與東省兵勇口角殺斃兵勇至五六百名之多其目無法紀已可槩見該大臣到東後並著酌量緩急如其尙懷觀望卽當設法殲除以靖直東邊患王恩第通賊各情先經文煜參奏疊有旨交孫治崇厚密拏正法崇厚等因其添募勇丁較多力不能辦該革員見在挾宋憬詩以自固前經諭令劉長佑拏辦正法如聞風折回東省卽著該大臣密速掩捕以軍法從事毋稍姑容將此由六百里諭令知之○諭譚廷襄奏捻會各匪竄向西北調派各軍截剿一摺捻首李城餘黨及會匪張守義等由嶧山竄撲兗郡復竄至南土柳牯及楊家窪一帶雖經官軍擊敗而永林遇伏

陣亡軍威稍挫賊餒愈張亟宜趕緊撲滅俾免延蔓見在賊竄甯陽西北臥牛山等處滋擾該處距省城不及三百里肥城平陰長清一路處處可虞而秦郡尤當其衝防守萬分喫重譚廷襄見調守備郭大勝等帶隊繞赴甯陽迎擊並令各州縣調團防堵惟兵力太單恐難抵禦德楞額一軍已與賊接仗卽著飭令星夜追躡會同富和等軍痛加勦洗毋令賊氛趨近省垣是爲至要僧格林沁已於初九日由皖回軍取道東昌勦辦降匪譚廷襄務於此軍未到之前將降匪張錫珠等實力搜勦毋稍疏懈甯陽匪勢猖獗本日已諭知僧格林沁酌量辦理一俟僧格林沁督軍行抵東昌譚廷襄卽可回顧省垣根本之地將此由六百里諭令知之○庚申左宗棠奏桐廬旣克杭州上游關鍵祇富陽一城而浙江自桐廬七里瀧以下地勢漸平江面漸闊縣城背江面山右阻一溪形

勢完固賊自踞杭後於此修築城壘雉堞一新當官軍克復桐廬時杭屬新城之賊均棄城而竄併聚於此踞杭之賊亦以前年所奪戰船溯流上拒臣飭副將楊政謨等自桐廬擊楫而下遙見賊船數百號排列城下前後均有礮船護之遂傳令師船作兩層排齊疾進大礮連轟江流鼎沸賊船頃刻延燒殆徧其礮船復爲我後隊師船擊散官軍並上岸蹙之踏平堅壘二座計焚賊船數百號奪獲礮船十數號民船數十號斃賊約以千計楊政謨等卽駐富陽城南岸徧之見在蔣益澧將臨浦義橋一帶布置略定卽飭高連陞熊建益馳赴富陽蔣益澧亦率後隊繼進見已由南岸渡江臣飭魏喻義率所部由桐廬前進適與之合探報有賊數千自杭城來援見擬先剿援賊以慌之如富陽堅城不能驟拔擬飭蔣益澧分兵助魏喻義扼要立營以綴城賊而自率所部由富陽而

下以撼杭城再由嚴州撥兵駐新城護以師船以禦賊援而通餉
運其屯踞皖南之賊約有三起一爲胡黃古賴諸逆卽踞甯國太
平石埭旌德者也一爲花旗賊前年由廣東湖南江西入浙皖者
也人數最多無甚伎倆爲金陵賊黨所不齒時尾賊後游行掠食
蹤迹靡常一爲賊首譚星卽前踞蘭谿抗官軍者也此股自蘭谿
敗竄浦江諸暨經劉典及各營躡蹤緊追直至富陽江邊其黨除
殺斃溺斃及解散外存者不及三分之一太平石埭之賊時窺黟
祁邊界總兵丁長勝等擊敗之賊從藍湖米坑而來將窺祁門北
界道員王文瑞等迎擊之怒馬馳入奮勇衝殺賊大潰敗官軍緊
追比近藍湖賊復回拒郭德馨馳斬數人餘賊竄逸追過米坑十
餘里約其斃賊千餘名生擒七十餘名其墮崖落澗死者無數有
此一戰胡古兩逆之勢頓衰祁黟當可無事惟徽休之賊日聚日

眾似花旗之賊已經合併譚星一股聞已由昌化過千秋關竄逼

徽州徽防官軍紛紛告警計劉典一軍此時亦已由威坪至屯溪

臣又催其新募之勇由廣信趨婺源機勢湊迫或可力遏奔衝規

杭郡可以綴賊竄擾江北之謀勦皖南可以遏賊突犯江西之路

爲大局計卽所以爲浙計臣惟有勉竭駑鈍慎以圖之以求仰紓

宸廑江西巡撫沈葆楨奏二月十四日徽北之賊由黃山楊村

潛口一帶擾及巖寺街距草市二十里同知王沐派兵由篁墩屯

溪分路前趨巖寺街隔河列陣該逆以兩股渡河猛撲我勇開礮

斃賊目二名賊卻而復進經官兵擊斃十餘名時休甯城圍未解

恐賊分襲婺源副將彭維玉以三成隊紮屯溪二成隊紮茶亭應

之次日該逆嚙擁直撲屯溪彭維玉率隊交鋒斃其衝鋒賊騎排

槍連環而進悍賊紛紛倒地營官王萼匹馬當先哨隊繼之殪賊

三百餘人乘勝追至茅嶺伏賊復起適王沐等自茶亭馳至前後夾擊復斃賊四百餘名餘賊始潰生擒百餘名解散難民二千餘人十七日探聞巖寺大股疾趨篁墩王沐知其必撲草市老營豫約彭維玉收屯溪之軍回援傳令各營偃息鎮靜任賊馳騁察看賊勢漸懈援軍將到鳴鼓展旗而出連放劈山礮斃賊目三名賊駭而退彭維玉亦至分路追擊殺賊無算至下草市賊復回顧我軍前隊分左右應之鏖戰一時復殺賊百餘名賊遂齊奔追至羅田收隊該逆仍由巖寺竄去連日奪獲軍械五百餘件據生擒賊供十六日一股爲僞襄王劉姓股眾約三萬撲屯溪者其前鋒二公子十七日一股爲僞俊天燕王姓股眾約二萬有餘皆廣東花旗後路尚有僞濂王股眾約七八萬約會合竄江西等語見在巖寺之賊退歸碣田萬安之賊退歸松橋臣查草市居徽休之衝爲

婺源一帶屏蔽繼果營勇僅二千且甫經戰陣臣甚慮其孤軍受

敵遁能疊獲勝仗洵足以寒賊膽見在鮑超已將甯郡一帶賊壘

掃蕩廓清敗逆相率而南徽休被圍頗急劉典一軍已由威坪抵

大川口必可進解城圍該逆終有竄江之志臣惟諄飭各防互相

聯絡穩固門戶上慰宸廑上諭議政王軍機大臣等浙省官

軍勦賊得手羣賊鼠竄恆欲由皖南就食江西見在太平石埭之

賊時窺黟縣祁門邊界爲總兵丁長勝等軍擊敗並經道員王文

瑞等各軍於藍湖米坑等處痛加截殺胡古兩逆之勢已衰祁黟

可以無事惟休甯尙未解圍徽境之賊日聚日多據左宗棠奏稱

花旗之賊業經合併而譚星一股亦已由昌化過千秋關竄徧徽

州與沈葆楨摺內所稱同知王沐等於巖寺等處擊走之賊皆爲

花旗廣匪正相符合草市地方旣爲休婺藩籬王沐等所部僅二

千人防剿殊形單薄此次雖由屯溪一路疊次擊賊獲勝仍著沈
葆楨督飭該文武等實力嚴防不得以甫經獲勝致或疏虞爲賊
所乘劉典一軍已由威坪抵大川口經左宗棠復飭催其新募之
勇由廣信以趨婺源是已繞出賊前機勢湊拍定能力遏奔衝以
解休甯之圍江省信防足資穩固卽著左宗棠督飭劉典等乘機
妥辦並與江省官軍隨時聯絡互爲防剿以全大局桐廬旣克杭
州上游關鍵止富陽一城業經左宗棠飭令水師大加轟擊並躡
平其江岸堅壘軍聲日振著卽飭令蔣益澧所部之高連陞等及
魏喻義等軍水陸會合將自杭來援之賊擊斷進拔堅城或令蔣
益澧分軍自率所部由富陽下撼杭城以規杭郡卽可輟賊竄援
江北詭謀均著左宗棠相機辦理另片奏請訓顧菊生等各員本
日業經明降諭旨允准惟由外補一節須俟各該員到浙後由該

撫察看隨時奏明請旨此時未便槩行照准恐致效尤而生奔競將此由六百里各諭令知之○論多隆阿奏更番移營接仗情形並派兵扼鄆縣長安各摺片德興阿由蒲郡移師渡河分駐同州城外及三河口兩處多隆阿見將原駐三河口楚軍撤回大營調遣所籌自屬周妥見在陳得才等股匪裹脅日眾西偏漢中鄆縣回匪未平鳳翔岐縣被圍日久未解甘肅固原回匪兇熾日熾亟盼同州一帶早行肅清方可分兵四路援應該大臣督辦全陝軍務所有全陝地利賊勢軍情嗣後務當隨時詳晰奏報見已移營孝義鎮喬千自可迅速攻克進拔倉頭老巢盡殲悍賊以清東路省垣糧路梗塞瑛榮惟知閉關自守竟不能出一旅之師扼要駐紮束手無策坐以待斃焉能取勝多隆阿見派總兵曹克忠管帶烏拉馬隊前往省城將瑛榮前後所募楚勇七營一併交該總兵

帶領責令在鄆縣長安交界地方紮營先通糧運繼圖進剿著瑛
榮卽將楚勇交曹克忠帶往鄆邑不得仍畱省城擁以自衛致誤
戎機省垣防剿尙有旗綠各營及勝保畱防之兵足敷應用著穆
騰阿瑛榮會同馬德昭妥爲布置並著隨時出隊與曹克忠一軍
互相聯絡庶南路糧運可以及早疏通盧又熊前有冒功並縱勇
殃民等情曾經諭令多隆阿查明並咨查川省是否由駱秉章派
令赴陝續據駱秉章奏明並非由該督派往並據瑛榮奏請以盧
又熊在陝累著戰功開復原參處分茲據兵部議奏以該撫所請
開復處分聲敘旣未明晰而該革員應行查辦各情亦尙未經查
奏著多隆阿瑛榮將盧又熊前被譴廷襄奏參各情迅速詳查具
奏毋稍遲延將此由六百里各諭令知之○諭崇實駱秉章奏四
川委員姚寶銘前赴湖南迎提田興恕本擬正月二十三日起程

來川因惲世臨奏懇將田興恕畱楚辦防事遂中止耽延日久請
飭惲世臨就近提解田興恕至省收禁候旨結案等語前因惲世
臨請畱田興恕募勇辦防所陳實屬冒昧當經降旨切責並諭令
該撫將田興恕迅速解川復諭令崇實駱秉章嚴飭派出之員會
同楚省官員解押田興恕入川卽行監禁想該將軍督撫等必能
欽遵辦理至田興恕籍隸湖南若卽在本省羈禁殊不足以昭慎
重崇實駱秉章所請畱楚監禁之處著毋庸議惲世臨日前覆奏
據稱已派副將田連考接帶新募之勇一面查明田興恕如過期
未行卽委員會同姚寶銘催解赴川等語著惲世臨嚴飭派出委
員會同姚寶銘迅速將田興恕押解入川儻任令藉端延諉託故
不前是此事皆爲惲世臨所誤必惟該撫是問崇實駱秉章仍恪
遵歷次諭旨趕緊迎提監禁一面具奏一面飛咨勞崇光張亮基

教民一案疊經派令崇實駱秉章在川妥籌辦理事體已有端倪
自應速了以存體制勞崇光張亮基一俟田興恕到川收禁後卽
迅速定擬具奏將此由六百里各密諭知之○予浙江陣亡副都
統錫齡阿建祠○壬戌諭議政王軍機大臣等據洪毓琛奏派隊
進攻鹽水港賊匪獲勝臺灣郡城防守已固署提督吳鴻源援師
進發一摺與上月徐宗幹奏到各情形大略相同惟據徐宗幹奏
逆首戴萬生遁入番社而此次洪毓琛所奏則戴逆仍踞守彰化
縣城見在賊勢窮蹙西螺義民請給札諭清莊練勇卽著寬其旣
往飭令迅將戴林二逆擒獲無得徒託空言儻能迅速蕆事卽准
破格保獎俾知感奮吳鴻源已由鹽水港進發諒近日嘉義城外
匪黨早可肅清卽著耆齡徐宗幹轉飭該署提督等仍遵前旨剋
期將彰化斗六克復毋得稍涉稽延至有竄逸之虞其鹿港營盤

並著轉飭曾玉明嚴密防守毋稍疏懈再四川成縣龍茂道鍾峻
前因該省清查捐務案內有該員經手事件聽候查辦見在員缺
久懸如該員應查事件業已完結卽飭迅赴新任倘一時不能赴
任卽著奏聞毋稍遷就將此由四百里諭知耆齡徐宗幹並傳諭
洪毓琛知之○癸亥 上詣 大高殿祈雨○諭內閣譚廷襄奏
官軍截剿河西竄匪殲戮殆盡生擒匪首及戕官要犯一摺匪首
楊蓬山一股敗竄過河疊被官軍擊敗復由南館陶一帶搶渡經
東省兵勇截殺多名該匪勢力窮蹙董道平設計將楊蓬山誘擒
其逆首張錫珠之子張金堂卽張豁子亦被官軍擒獲訊係下手
賊首逆醫大名道秦聚奎要犯兇惡尤著尤須盡法懲治以洩公
憤而平人心楊蓬山張金堂卽張豁子著譚廷襄訊取確供卽在
軍前正法梟示並著嚴飭各路帶兵員弁搜捕匪黨務絕根株勿

諸餘孽○譚廷襄奏三月初三四等日黃國瑞督軍晝夜攻擊中村並密令投誠之宋斌宋三剛等率領四十餘人乘隙入圩埋伏暗處夜間囊土填河而過黃國瑞督同知府文彬等分路進攻突撲圩根豎梯爬牆施放噴筒火箭宋斌宋三剛等在內接應四處縱火賊勢大亂由西門突出我軍槍隊先伏濠內齊起轟擊黃國瑞督率兵勇兜回鈔裏擊中匪首孫化詳落馬餘匪覓路衝突我軍層層圍住將孫化詳等匪一千四百名斬殺淨盡所有槍礮馬匹器械悉數奪獲圩內餘匪盡行搜殺當於初五日將中村攻克又據王成謙稟報三月初三日赴蘇家頂攻剿曬書臺幅匪先經諭調情願投誠之老山等處五寨選丁助戰並親督勇團及蘇家頂寨丁分路並進其時鳳凰山教匪李九寶泉崗幅匪程四虎與曬書臺幅匪徐明意等分股迎敵千總李炳武等督隊衝入冒

煙突火陣斬悍賊多名並將徐明意劈傷頭面被匪眾拌死奪去
分路狂奔我軍追殺二百餘名曬書臺內踞守之匪望風而潰滾
崖跌斃無數我軍趁勢搶上立將該寨焚毀臣查匪首孫化詳稔
惡多年襲踞中村茲黃國瑞及文彬等設伏進攻兩旬之間堅圩
立拔長髮首夥千餘斬戮無遺實足快人心而懲兇慙費縣自旗
旺等山攻克後吳王固爛魚店老山等數十寨先後就撫見又將
曬書臺平毀大致已可逐漸清釐惟蘭境尚有邱春張寶潰等匪
費境尚有岳相林邱兆林王平等匪雖股數業已無幾必當乘勢
一氣殲除至餘賊敗遁不無伏匿尤須趕緊搜捕臣與黃國瑞商
令長賡王成謙各帶勇練或自西而東或自東而西會合黃國瑞
所派各軍分路兜剿俾蘭費兩屬一律廓清即可拔隊西行進攻
寶泉崗賊巢此次攻克中村出力員弁謹先行開列可否仰懇

天恩分別鼓勵其餘在事出力員弁及練總人等准臣覈實請獎以昭激勸江省出力員弁兵勇應由吳棠查明請旨獎敘上諭議政王軍機大臣等劉長佑自馳抵威縣大營後督飭各路員弁兵勇分投剿截其北竄之賊經徐廷楷等沿途兜擊斃賊甚多該匪由深州之新莊等村奪路南奔其南竄一股在廣平縣小張固地方被姜國仲恆齡擊敗退竄打兒寨一帶與新莊等村敗賊合爲一股剿辦尙屬得手著劉長佑迅督所部乘此聲勢合力兜擊聚而殲旃毋令乘隙他竄楊蓮山並張錫珠之子張金堂均經東省官兵擒獲匪黨自必聞風膽落所有莘冠各境餘匪不難悉數殄除卽著譚廷襄嚴飭各軍盡力搜捕淨絕根株勿畱餘孽至張金堂供稱伊父張錫珠於二月二十六日在威縣境內被白旗馬隊洋槍擊斃等語是否屬實著劉長佑確切查明毋令漏網稽誅

致貽後患李城餘黨及張守義等匪向萊蕪一帶竄逸意在勾結
淄川踞匪譚廷襄飛催德楞額等追剿並飭令淄川軍營扼要迎
截德楞額跟蹤前進當可追及著飭令認真剿辦盡殲醜類以免
蔓延蘭山中村之賊業已殲除費縣之曬書臺賊寨亦經官軍攻
克仍著譚廷襄激勵諸軍乘勝進攻務將蘭費一帶教幅各匪迅
速蕩平毋再遷延致負委任將此由六百里各諭令知之○諭張
之萬奏東匪疊撲臨漳縣城官軍擊退仍探蹤堵剿並遵查省城
回民情形各摺片東匪退回直境見在直省屢獲勝仗諒因僧格
林沁帶隊來直派蘇克金統帶馬隊由河北進剿該逆聞風震懾
退回肥鄉等處計蘇克金馬隊不日可到李世玉等所部無多自
未便追入直境著該撫飭令該將士等擇要扼紮如有直省擊敗
餘匪竄入豫境卽行相機截剿汴垣回民素稱安分其寄寓之陝

同各有生業該撫已查明年歲籍貫姓名住址隨時稽查奸宄自不至濶入第漢回構釁總因猜疑而起該撫尤當示以坦白嚴飭該府縣使之照常相安毋稍滋擾驚疑至河洛回民攜帶馬匹器械結隊赴陝不可不嚴行堵截並著張之萬轉飭該地方官認真稽查毋任結隊西行該撫前陳豫省鎮道未能得力並吏治廢弛情形至今甄劾寥寥諒慮參劾之員捏造謗言未能實踐所言第朝廷於此等情狀早能洞悉隱微而劣員充位必致軍務吏治毫無起色該撫務當破除一切毋待諭旨詢問始行甄劾也將此由六百里諭令知之○諭熙麟奏平涼被圍調派兵勇往援並查明平涼漢回仇殺情形又遵覆剿撫機宜各摺片固原回逆大股攻撲平涼府城勢甚危急雖經熙麟調派兵勇前往援救第倉卒湊派兵力過單恐難得力該督前次所調各路援兵仍著迅速飛催

剋期會集乘銳進剿力解城圍並嚴飭在事員弁實力防守以待援師毋得稍有疏懈河東協餉銀十三萬兩均在平涼城內縣庫存放經熙麟飭令該守等運赴慶陽供給兵餉而署守田壽增稟覆枝梧延不遵解實屬可惡著熙麟查明嚴行參辦此時熙麟一軍當防剿萬緊之時餉需不繼將士斷難枵腹荷戈前聞多隆阿軍營於攻破回巢後有起獲窖銀鉅萬之說此次熙麟摺內亦稱該營續挖窖銀幾及一二百萬所奏必非無據卽著該大臣酌量提出二三十萬兩派員解交熙麟軍營以濟然眉多隆阿素顧大局想必能妥籌辦理也本日據議政王等面呈熙麟咨文據稱雷正綰見丁母憂懇請回籍守制等語已明降諭旨將雷正綰固原提督一缺改爲署任並賞給銀四百兩治喪以示體恤矣見在陝省軍務方急雷正綰當念移孝作忠之義勉抑哀思一意剿賊以

副委任恩麟奏遵查定安遷延不進情形請俟熙麟到任查參此等怯懦之員豈可令其日久尸位貽誤事機已明降諭旨將定安革職鞫問矣熙麟未到以前卽著恩麟查明該革員退縮情事按律定擬具奏將此由六百里諭知多隆阿熙麟雷正綰並傳諭恩麟知之○江南提督李世忠奏勝保情有可原才有可用請從寬議罪得旨前據留國藩轉奏已諭知該大臣轉飭該提督仍遵前旨迅速立功毋得徒託空言嗣後有應陳事件仍著稟明留國藩覈定奏聞以一事權○以勦賊遷延褫定安職逮問○予江蘇陣亡通判林昌鉉祭葬世職○甲子諭議政王軍機大臣等本日明降諭旨將耆齡補授福州將軍左宗棠補授閩浙總督兼署浙江巡撫並諭令耆齡卽將所辦閩浙兩省防勦事宜及所部各軍移交左宗棠接辦左宗棠接辦後耆齡卽赴福州將軍之任左宗棠

見駐浙省軍務正當緊要其浦城防所應卽遴委大員前往押營
如何接辦之處卽由左宗棠酌度奏明辦理閩浙兩省軍務兵勇
均歸左宗棠節制耆齡所部廣勇並著左宗棠於閩浙軍營中選
擇善於駕馭之員派令統帶如廣勇實係不能得力有害無利卽
著左宗棠酌量撤遣浙省係左宗棠兼轄省分旣兼署巡撫尤責
無旁貸曾國荃著仍統前敵之軍駐紮雨花臺一意相機進取以
圖金陵毋庸以浙事爲念此時曾國藩巡江諒已旋至安慶仍著
隨時與曾國荃熟籌戰守機宜東南軍務惟在該督撫等勦力同
心通籌全局共圖挽救國家異數酬庸尤爲地方擇人起見該督
撫等諒能益矢公忠以副委任也福建省地方一切應辦事宜卽
著徐宗幹認真整頓妥爲經理左宗棠身任兼圻遇有地方公事
應行兼顧者與徐宗幹隨時咨會辦理將此由五百里各諭令知

之○諭有人奏降眾通賊有礙直隸山東軍務請密飭翦除一摺據稱叛匪張錫珠等以山東堂莘冠館等縣地方爲巢穴與直境逼近往來甚便必須東省擣其巢穴直隸兵勇追剿夾擊方可聚殲惟欲清東境必須先除降眾該降眾等均與張錫珠股匪爲犄角之勢等語宋憬詩等狼子野心本非善類見復由陝西擅回東省招集黨與通賊殺團並戕害兵勇多名致官軍民團均受牽掣不能專力剿賊若復再事羈縻恐該降眾聚集益多乘隙舉事愈難勦洗僧格林沁見由亳州移師北上計可行抵東省著卽相度機宜將宋憬詩雷鳳鳴設計調至大營訊明正法一面將所部降眾分別解散其桀驁者盡行搜捕以清後患惟宋憬詩等耳目眾多恐其間風遠颺豫爲防範僧格林沁務當不露聲色慎密將事斷不可稍有洩漏致誤事機原摺著鈔給閱看將此由五百里密

諭知之○以耆齡爲福州將軍左宗棠爲閩浙總督曾國荃爲浙

江巡撫未到任前以左宗棠兼署萬啟琛爲江蘇布政使馬新貽

爲安徽按察使

由記名道遷

○停福建本年例貢○乙丑諭內閣前因

光祿寺卿潘祖蔭等奏參勝保自督辦皖豫及陝西軍務以來跋

扈貪污欺罔無忌種種劣蹟法難姑容降旨革職拏問交刑部治

罪嗣因該革員到部派議政王軍機大臣大學士會同刑部審訊

時以該革員情罪重大必須審明確實始足以彰國憲而重紀綱

本年二月間據給事中趙樹吉奏勝保罪狀昭著雖置重典無以

蔽辜而該革員黨與甚多誠恐謠誣紛騰危詞聳聽請特申乾斷

以重刑章復經諭令原派王大臣等覈實辦理嗣據該王大臣等

訊取勝保原遞親供呈覽與原參各摺件及陝省信函呈詞迥不

相符並聲明摘錄情節再行駁詰本日據該王大臣等將駁訊勝

保親供具奏並據御史吳台壽奏勝保有克敵禦侮保衛地方之功無失地喪師貽誤大局之罪有私罪而無死罪給事中趙樹吉所奏實爲過當懇請持平辦理各等語勝保所遞親供多屬矯辯此次復行駁詰條款內如逆首陳玉城之妻投河身死並不將伊弟陳安城等卽行正法及安坐省城按兵不動剋扣軍餉縱勇殃民各情該革員或稱事出有因或謂原參失實覈其情節殊難憑信朝廷執法一秉大公斷難據該革員一面之詞遽爲定讞況其被參被控各節如果屬實均有軍營冊籍地方文報及營員官吏等可查無難徹底根究以成信讞若如趙樹吉所奏遽將該革員明正典刑固無以折服其心若竟謂該革員過止一身罪應末減如吳台壽所奏亦無以服天下後世總之準情科罪朝廷並無成見惟須情眞罪當方足以定爰書而申憲典誓原派王大臣等再

將該革員被參各款內應查文卷應提人證迅卽酌量分別查提
無論已認未認一併切實根究質訊明確按律定擬無任執詞狡
展吳台壽摺一件並前交趙樹吉摺一件均著彙案覈辦○諭愛
仁王茂蔭奏審辦員楊氏一案檢點骨殖司員桂迓衡呈請撤退
請飭刑部酌覈知照並請另派大員審擬一摺此案員楊氏骨殖
經愛仁王茂蔭督同委員司員仵作等細心檢驗既無產死確據
何以桂迓衡呈稱謀命誣飾事本相因既非毒死卽係產死無疑
仍請照原案審結實屬挾有成見自未便仍令承審桂迓衡著卽
撤退並著刑部將向來檢驗因產身死之婦以何爲憑有無辦過
成案詳悉原明迅卽知照愛仁等辦理仍選派熟習案情司官二
員馳赴山西隨同審辦務期水落石出以成信讞愛仁等所請另
派大臣赴晉審辦之處著毋庸議○諭議政王軍機大臣等總理

各國事務衙門奏請禁濟賊糧等語長江通商後不但洋商易以米糧濟賊卽內地商船往往借豎洋旗闖過關卡暗以米糧運濟金陵賊匪近聞江北之米商船任意裝載運赴金陵銷售船上亦並不借豎洋旗各關卡亦並非毫無覺察而淮安等關分卡希圖收稅襲下河一帶釐卡希圖抽取釐金一經徵完釐稅卽不問其所之各情見在官軍徵兵籌餉規取金陵朝廷日深懸盼若有商船暗中濟賊攻剿安能得手關卡釐卡各員希圖抽收稅課明知故縱尤屬貪小利而忘大害實堪痛恨著李鴻章吳棠督同淮安關監督妥議章程將前項情弊設法禁止嗣後如再明知故縱卽著李鴻章吳棠將管理關卡監督釐卡委員從嚴參辦毋稍姑容將此由五百里諭知李鴻章吳棠並傳諭永存知之○沈葆楨奏探聞皖浙巨逆議分三路同時竄犯江西僞侍王李逆糾浙江餘

黨並花旗等股由徽休進偽輔王楊逆糾古賴諸賊目由祁門進
偽孝王胡逆偽堵王黃逆偽祐王李逆由青陽進每路號稱十餘
萬聞二月二十五日繼果營隨同浙江臬司劉典會剿徽屬之巖
寺街賊匪陣斬數百人淹斃三千餘人二十九日贛南道王文瑞
擊賊於漁亭擒殺千餘名景鎮爲休祁後應各營聲勢聯絡此兩
路似可無虞惟青陽守兵頗單東流建德節節空虛殊爲可慮據
段起報稱該逆從甯國繞出青陽前鋒已至稠嶺去建德僅數十
里臣以彭湖鄱浮均與建德接壤飛飭參將韓進春馳赴鄱建交
界之石門街陳家街一帶扼要截擊並與祁門景鎮湖口各軍互
相應援復飭副將孫昌國分撥礮船扼守鄱屬之陶家灘童子渡
道員屈蟠駐紮樂平飛催道員王德榜馳赴浮梁防所續據署饒
州府知府吳秉衡報稱該逆於三十日竄擾建德殷家匯張家灘

榨子橋等處徧地賊蹤旋准督臣曾國藩函知間甯國各逆有西
竄之意已飭提臣鮑超回軍南陵青陽一帶截之臣計賊蹤飄忽
鮑超回軍萬難撥出賊前然江省防兵能與前後夾擊該逆當不
得逞上諭沈葆楨奏江省防軍隨同劉典剿賊於巖寺街賴南
道王文瑞擊賊漁亭均有斬獲休祁兩路可以無虞而青陽守兵
頗單甯國之賊繞由此路竄至建德東流一帶殷家匯等處地方
是江省信防稍鬆饒防更復喫緊沈葆楨飭令參將韓進春副將
孫昌國水陸各軍前往鄱陽毗境扼截並催飭道員王德榜馳赴
浮梁防所以爲堵禦所籌尙屬周妥並據奏稱接曾國藩函知甯
國各逆西竄已飭鮑超回軍南陵青陽一帶截剿惟此時賊蹤已
至東流建德鮑超一軍勢難繞至賊前如果江省防兵布置得宜
到處迎頭堵剿後路得有鮑超勁旅跟蹤緊躡當不難收前後夾

擊之效著曾國藩卽飭該提督之軍乘機追剿並著沈葆楨嚴督
饒防各路官軍探蹤迎擊與鮑超之軍隨時聯絡毋稍疏虞徽境
之賊雖疊經堵剿而休甯尙未解圍尤恐賊因青陽一路不得逞
志乘閒由徽休之路逞其圖犯江境詭謀並著左宗棠沈葆楨嚴
飭徽屬及信防各軍加意嚴防毋稍鬆懈本日又據總理各國事
務衙門奏請飭嚴禁商船運米濟賊等語著曾國藩督同各關監
督等妥議章程設法禁止以後如再明知故縱卽由該督撫將管
理關卡監督委員從嚴參辦毋稍寬貸將此由六百里各諭令知
之○諭嚴樹森奏皖豫捻逆竄向東南追剿情形並駐紮黃州就
近調度一摺捻逆陳大濤等由豫省竄擾光山擾及麻城之白果
嶺等處經官文等調派總兵穆正春等進剿該匪折向東南見踞
竹瓦店但店等處嚴樹森見已帶兵出省馳抵黃州之團風鎮扼

繫就近調度著官文嚴樹森卽飭舒保成大吉等痛加遏剿以收
夾擊之效見在賊勢逼近黃州雖距武漢較遠而與皖省潛山太
湖一帶壤地相連深慮該逆蓄意東趨與巢含和一帶髮逆互相
勾結嚴樹森當督飭諸軍繞出賊前迎頭截剿毋得任賊竄入皖
境致滋蔓延並著唐訓方選派兵勇激勵鄉團於交界地方嚴密
堵遏毋令賊蹤闖入皖境前因此股捻匪竄入鄂疆諭令張之萬
毛昶熙飭令余際昌一軍會同楚師合力攻剿張之萬等務宜不
分畛域飭令余際昌越境會剿毋許觀望遲延致滋貽誤將此由
六百里各諭令知之○飭禁商船濟金陵賊糧○予秦儒毛亨明
儒呂枏從祀 文廟○丙寅諭議政王軍機大臣等劉長佑奏分
軍剿匪獲勝籌防北路情形咨催僧格林沁先赴直境各摺片直
隸竄匪經官軍擊敗後復分兩股一由隆平等處向西北竄逸一

由平鄉等處向南路奔逃疊經徐廷楷等分路截剿頗有擒斬第該匪分合無定蹤迹飄忽非分紮步隊扼其竄路而以馬隊追剿不足以制其死命見在直省馬隊尙嫌單薄劉長佑初到直省人地究尙生疏僧格林沁於北路情形本係熟悉而威望素著自能酌度緩急先清畿輔之患直隸股匪巢穴雖在山東然必須直隸賊蹤淨盡劉長佑督兵扼紮邊界屆時僧格林沁進兵東省可無後顧之患該大臣見在行抵何處著卽統帶全軍迅赴直境督兵攻剿以期及早蒞事毋爲東匪牽掣將此由六百里各諭令知之

○唐訓方奏臣於二月二十日行抵蒙城知僧格林沁仍駐毫東之白龍廟臣卽畱親軍駐蒙彈壓乘礮划星夜前進二十二日與僧格林沁會晤查捻逆倡亂蔓延數省僧格林沁力戰年餘渠魁始得授首地方漸就廓清第宿亳蒙永之間周圍數百里新撫之

圩降眾不下數萬其中被勦暫投心存反側者正復不少加以張逆死黨如張總愚程二老砍等亡命在外眾尙萬餘大軍一撤勢將回竄非畱重兵控制誠恐死灰復然臣與僧格林沁悉心籌商飭委道員馬新貽署理廬鳳道篆兼辦善後並飛調總兵徐鵬四營駐蒙亳之交其總兵王才秀三營本駐蒙城暫緩移動僧格林沁亦酌撥馬步勇千名均歸馬新貽調遣仍諄飭該道督同府州縣清查圩寨搜捕餘匪招集流亡凡一切應辦事宜條議舉行臣與僧格林沁計議已定卽於二十七日折回蒙城分派蒙城縣知縣賀緒蕃等清查捻圩查得蒙邑西鄉賈家圩巨捻賈汶彬怙惡不悛見糾黨三百名助太和縣之朱圩力拒僧格林沁之軍以待豫捻回援其所管數十圩雖願歸順皆畏賈汶彬所偪不敢報官臣當飭已革總兵普承堯督帶兵勇於本月初六日往勦該圩周

圍二里濠塹三重西南北三面皆有寨門賈逆拌命死拒槍發如雨普承堯令暫革副將唐敏興攻其西縣丞唐訓邦攻其西南面以參將唐啟虞一軍由東越濠超壘拋擲火毬火彈而入仍畱北門爲該逆敗竄之路令守備唐敏魁帶兵伏二里外以待迎擊該逆從西南兩寨門奪路衝出兇銳莫當其出南門者八九百人唐訓邦以劈山礮連環轟擊斃賊二十餘人其勢稍卻我軍猛撲偏賊入濠聚而殲旃其出西門者約千餘人先驅悍賊並馬馳突而來唐敏興率隊迎之擲火彈以亂其陣賊馬驚竄我軍後隊爲偃月陣環擊之賊遂大潰時唐啟虞從圩內追出裏外夾攻斬殺殆盡敗賊從北遁者皆被唐敏魁一軍截殺圩中婦孺與投戈降順者悉予免死比經降眾認出賈汶彬已死亂軍中矣其計殺賊二千餘人奪獲羸馬百餘匹救出被擄婦女二十人

臣思賈汶彬當

大兵撻伐羣捻肅清之會何敢助逆抗官儻加兵稍遲難保不句
匪回竄茲幸將士用命醜類殄除餘黨震懾連日收撫百餘圩悉
令薙髮並將救出婦女分遞原籍此後辦理更當順手臣俟此閒
布置就緒仍回臨淮 上諭蒙城巨捻賈汶彬見已殲除而張總
愚程二老砍等尙復稽誅見在徐鵬等四營駐紮蒙亳之交王才
秀亦駐蒙城僧格林沁復派馬步勇千名助剿爲數已不爲少如
有餘匪蠢動或張總愚等大股回竄著唐訓方飭令該總兵等實
力剿洗趕緊撲滅僧格林沁已督軍北上蒙亳一帶善後事宜唐
訓方責無旁貸著相度機宜悉心籌辦新撫各圩降眾過多必須
妥爲彈壓方可消其反側至招集流亡撫綏瘡痍尤須加意安輯
毋令失所臨淮一帶見尙安謐唐訓方辦理蒙亳地方事務甚關
緊要不必急於折赴臨淮馬新貽昨已簡放安徽按察使仍著駐

紫蒙毫一帶督同英翰將頤宿等處勦撫各事宜妥爲清理以期永遠相安方免流弊將此由五百里諭令知之○諭瑛棨奏沔縣失守漢中鳳翔等府軍情日緊一摺另片奏髮逆圍攻漢郡勢甚危急等語見在漢郡軍情日見緊迫而所調楚蜀各軍無一至者設有疏失後患曷可勝言據瑛棨奏接梁作楫周有全等來稟以未奉本省札飭不敢出境援陝等語著官文嚴樹森懍遵前旨速飭李雲麟會同梁作楫等督率所部馳赴漢中援勦毋得稍有遷延致干重咎並著駱秉章遵照疊次寄諭先其所急迅飭周達武督勇星馳赴陝會合漢郡諸軍盡力勦洗毋稍推諉貽誤事機卽坪廳城復經邱振家等帶勇收復該團總屢著戰功著瑛棨飭令邱振家等隨時激勵團勇協助官軍勦賊如果續有勞績卽著該撫據實奏請獎勵王夢麟折回後曾經諭令趕緊前赴鳳翔該郡

被圍已久情形益緊著瑛榮飛催雷正綰迅由盤鄂一帶節節掃蕩直抵鳳郡瑛榮毋得以防守省垣疏通餉道爲詞致雷正綰再有牽制不能剋期進剿也沔縣業經失陷略陽又復告警該撫疆寄躬膺責無旁貸何以毫無布置至此並著妥籌兼顧毋得再有貽誤將此由六百里各諭令知之○諭毛鴻賓奏黔省苗教各匪復行勾合起事見派兵勇越境援剿一摺貴州苗教各匪叛服無常最爲楚南邊界巨患此次思南石阡等處苗教各匪勾結起事而銅仁之降匪蕭文魁相繼復叛擾及印江思州鎮遠施秉各屬黔省下游幾於無處非賊毛鴻賓見派總兵周洪印等移師大魚塘扼要駐紮並令參將楊洪明一營馳赴銅仁會剿知府戈鑑副將滕加洪各守要地所籌均極周密卽著督飭周洪印等軍嚴密布置乘賊初起之時會合黔省官軍迅圖撲滅以靖疆宇上年楚

軍越境援黔援粵所向有功具見該撫不分畛域辦事認真此時所派各軍皆係得力勁旅諒必能奮勇殺賊保境恤鄰也毛鴻賓另摺奏湖南釐金辦有成效請仍照舊經理等語所陳均係實在情形卽著照舊辦理毋庸另議更張該撫仍隨時認真稽覈毋令日久弊生以收裕餉便民之效將此由六百里諭令知之○諭韓超奏逆匪竄擾江內經官軍截擊全勝內江肅清一摺逆匪何二強盜糾約苗匪竄入江內占踞黃精大小頂卡四出分竄總兵羅孝連等督隊先後擊退攻克賊巢多處該匪悉竄外江而去韓超見已分派各軍過江進剿卽著嚴飭各路兵勇乘勝追剿並飭各該地方文武所轄地面派團一體堵禦務將賊氛迅速掃蕩毋任再致內竄本日據毛鴻賓奏黔省苗教各匪分投竄擾銅仁思州青谿等處下游各郡幾於無處非賊毛鴻賓已飭總兵周洪印等

移師大魚塘就所部抽撥參將楊洪明一營馳赴銅仁與黔省官兵聯絡防剿著韓超迅飭黔省帶兵將士與楊洪明會合夾擊痛殲醜類張亮基見在尚未到黔韓超責無旁貸務宜振刷精神嚴督各路將士迅掃賊氛將此由五百里諭令知之○改丁憂甘肅提督馬德昭爲署任仍畱陝剿賊賞銀四百兩治喪○廣江西弋陽縣學額三名○丁卯諭內閣前署漕運總督江甯布政使王夢齡曾於咸豐十一年十一月間令其來京以五品京堂候補迄今已逾年餘該員尙未抵京顯係任意延宕王夢齡著卽勒令休致○曾國藩奏據提督李世忠咨稱九洑洲浦口各營自被賊圍前敵糧路梗塞軍火缺乏與江浦不能互通消息危急萬分二月初三初四兩日又增賊黨二萬餘人四面環攻猛撲不休該將弁等目不交睫竭力堵禦兩晝夜至初四日勢難再支遂將浦口以西

及城南營寨一併撤回江浦城內查浦口一城本毀於賊我軍在西南兩門外分營駐紮此次被圍挫退實因半月來內無糧藥外無援軍以致不能固守至江浦存城將士自初五日以後亦經力守旬餘屢與賊戰傷折不少乃賊眾繞城密圍水泄不通城中食盡糧運又絕子藥既罄徒以輒石擊賊而賊攻益急行將就斃該鎮將因於十六夜率領弁勇冒死殺出江浦縣城維時橋林防營已被困二十餘日江浦陷後羣賊悉趨橋林該營守將邱昌良激勵士卒奮勇爭先以守爲戰十八日賊竟愈聚愈多不下六七萬眾槍礮如雨我軍死守疊有傷亡賊又以礮轟塌城樓緣梯直上並有踰濠越牆進者各勇短刀相接眾寡不敵邱昌良身受重傷經左右背負出圍退至大勝關部卒十傷八九各該處失事人員委係力盡援絕可否均邀寬免惟世忠忝襄軍務不能先事籌防

無可辭咎應乞奏參請旨革職撤去勇號不准畱營至豫勝營一軍或派副將朱元興接統世忠罷職後決不敢任意妄爲致負國恩等情查浦口江浦二城爲濱江絕大關鍵一經失此重險上可由和含巢各屬進逼廬州下可犯儀揚各防進窺裏下河表延數百里未易勦辦該提督李世忠悚惶引咎深明大義應如該提督所陳請旨將李世忠卽行革職撤去勇號不准畱營並懇 聖恩允其所舉卽派副將朱元興接統該軍以重防務臣自上年十月卽有調度該軍之責未能先事籌畫又不能設法救援咎亦難辭應請旨將臣交部議處 上諭李世忠以提督大員辦理浦口等處防務不能竭力固守以致營盤被陷咎實難辭卽照其自請予以嚴譴亦所應得惟念該提督此次失守各營實因糧盡援絕眾寡不敵尙非有心貽誤上年攻克六合等城頗著戰功該提督業

因另案革職畱任著加恩撤去幫辦軍務免其革職以示懲該
提督疊經朝廷恩施逾格始終保全嗣後務當奮勇殺賊立功堅
守滁州六合等處毋爲賊擾以贖前愆曾國藩節制江浙提鎮各
員不能申明約束先事籌防實屬調度無方著交部議處仍著該
大臣嚴督李世忠在營各將弁明定賞罰迅圖恢復毋任稽延○
曾國藩奏查近日軍情金陵駐守如常甯國自二月初屢捷後鮑
超派何紹彩一軍守西河王可陞一軍守灣沚洪容海一軍守清
弋江其劉松山仍守甯國府城易開俊仍守涇縣朱品隆仍守青
陽縣又換調吳廷華守南陵縣逐節布置糧道通暢甯郡應無他
虞蕪湖金柱關兩防自前月大戰獲勝該逆至今不敢再逞臣於
二十七日過大通聞黃汶金等大股由青陽上竄臣卽兼程西旋
次日抵省調喻吉三護軍二營赴池州李榕鈞字五營赴東流以

截賊竄江西之路乃兵甫渡江賊已由建德闖入彭澤鄱陽境內而譚星及古賴等股又蔓延於徽州各屬兩路皆有深入江西之勢幸浙江臬司劉典與唐義訓王沐等在休歙兩縣屢獲勝仗徽州一路必可擊退其建德一路竄入者恐貽江西腹地之憂臣正檄令鮑超由青陽赴援景德鎮冀保江西完善之區旋據各營告警僞忠王大股上竄分枝牽掣廬江無爲州之兵而以全力猛撲石澗埠臣有銘劉連捷營盤自初三至初七日晝夜圍攻糧路斷絕文報不通臣不得已又飛檄鮑超改道渡江以解石澗埠之圍曾國荃亦自金陵分撥五營救援該處能否趕到尙難豫定又股匪從河南竄入湖北之麻城經鄂軍堵剿卽自三里埂竄至蕪水境內其勢亦將歸併皖境見在安慶廬州各屬處處喫緊竄入江西之賊別無大枝勁旅可以派往援剿幸撫臣沈葆楨已調水陸

萬餘人分守景鎮樂平兩處或者足資扼堵江之南岸徽州與江西同警江之北岸下游與上游同警臣調度無方焦灼實深上諭議政王軍機大臣等曾國藩奏賊渡九洑洲攻陷浦口江浦兩城及橋林要隘並密陳李世忠挾賊自重情形請撤去幫辦軍務仍准畱營及皖南逆匪上竄闖入江西之彭澤鄱陽境內各摺片李世忠桀驁不馴平日擁眾自雄斷不肯遽釋兵柄誠如該大臣所奏該提督自請革職不准畱營之處未必出於至誠見在江浦等城隘被陷僞忠逆復率眾猛撲石澗埠營盤江北軍情正當喫緊天六一帶防剿亦不可鬆勁若竟准李世忠所請則該提督轉得置身事外將來接統其眾者或暗與賊通或公然犯順李世忠皆得諉爲不知朝廷又豈能無故加之以罪此等詭謀該大臣想亦知之甚悉已明降諭旨將李世忠撤去幫辦仍畱本任並將曾

國藩交部議處矣本日據都興阿等奏稱賊竄江浦之時駐防豫勝營兵勇被賊擄去者不少今擬竄蔣壩圖犯裹下河之舉卽係此起投賊之勇撮爲引導等語是其自陳竭力苦戰情形恐不可信且其呈稱橋林守將邱昌良家眷尙在該處營陷後該將因受傷退至大勝關各等語見在邱昌良家眷是否尙在賊中大勝關偏近雨花臺大營邱昌良何以到彼養病有無偵探詭謀必須加意查察此時髮逆紛竄江北原未可激之生變另起一波而尾大不掉終爲異日之患會國藩前有李世忠部卒疑貳且不善戰激變亦不足慮之奏諒該大臣已有成算在胸嗣後李世忠之舉動務須隨時訥察其如何設法鈴制之處惟在該大臣隨時相機辦理不爲遙制皖南大股逆賊由建德闖入彭澤鄱陽鮑超改旆渡江旣不克赴援景鎮卽會國藩所調之喻吉三李榕各營亦落賊

後江省素無大枝勁旅恐不足以禦茲狂寇江忠義一軍計日亦應東下著該大臣一面飛催前進一面酌量情形如果屆期集合等處兵力足敷剿辦此軍即可令其改道馳赴饒州一帶迎頭截擊如賊已竄入腹地能否飭調該提督駐師江境相機進剿並喻古三等拔營追躡俾與江省各軍收夾擊之效均著該大臣迅籌辦理江省爲浙皖諸軍後路關繫東南大局該大臣身膺重寄諒能妥籌援應與沈葆楨其相維持不至有誤事機密片著畱中將此由六百里密諭知之○諭都興阿等奏水師剿賊獲勝並陳陸路軍情並請簡派大員督辦糧臺各一摺另片奏遊擊李世恆索餉滋事派員赴秦查辦等語揚防水師於上游之七里洲等處下游之圩塘各港口疊獲勝仗而上自包港下至江陰石牌處處均有賊蹤時思北竄亟應嚴密防範著都興阿等督飭上下游水師

統領實力逡巡相機剿截如下游情形喫緊卽著富明阿馳赴靖
 秦一帶嚴防毋得稍涉鬆勁至江浦之賊議欲分股窺犯儀揚牽
 掣我軍餘逆悉由和州等處合竄蔣壩從裏下河後路包鈔是逆
 情詭譎將圖大逞且逆竄蔣壩之舉卽係豫勝營投誠之勇撮爲
 引導尤不可不加嚴防本日已將吳棠補投漕運總督並明降諭
 旨將江北軍務地方一切事宜均仍歸吳棠節制該漕督責無旁
 貸所有蔣壩等處要隘卽著吳棠嚴飭在防將士實力扼守不得
 稍涉大意都興阿等仍隨時會籌防剿保全完善要區是爲至要
 許道身旣呼應不靈已降旨毋庸辦理糧臺以喬松年補授江南
 藩司專辦江南北糧臺矣專摺奏事一節體制未協且恐他處糧
 臺紛紛效尤所有糧臺應辦事宜喬松年宜隨時稟商吳棠都興
 阿等卽由吳棠陳奏以一事權該藩司雖專辦糧臺遇有地方應

辦公事並著稟商吳棠實力經理毋許推諉北渡難民露宿江灘
顛沛流離情殊可憫第人數過眾恐易聚而生事仍著都興阿吳
棠等飭屬妥爲辦理應拊循者加意拊循應盤詰者嚴加盤詰務
令難民不至失所而奸宄不能溺迹方爲妥善江北糧臺專供揚
防軍需乃李世忠營中遊擊李世恆膽敢在泰需索軍火帶隊赴
臺開放洋槍藉端滋擾實屬目無法紀都興阿等見派副將刁經
明等前往查辦卽著飭令認真嚴查將爲首滋事之人卽行正法
並將李世恆拏獲嚴訊按照軍法從事以儆兇頑將此由六百里
諭知都興阿富明阿吳棠並傳諭喬松年知之○曾國藩奏僞輔
王楊輔青糾約僞隨王跟王堵王祐王等酋嘯聚西河灣沚紅楊
樹黃麻渡麒麟山一帶不下十萬餘人以一大支鈔出高祖山之
前潛匿村落中距我營七八里十數里不等以一小枝繞過高祖

山之背橫出楊柳鋪揚言上犯涇縣火光燭天晝夜不滅鮑超飭令宋國永布置高祖山營寨堅壁穩守另在板橋寒亭清弋江等營抽隊數成親自督率設伏於太子廟山坳以伺其變二月初一日烏沙鋪之賊進逼獅子山約三四萬眾旌旗蔽空迤邐而來將高祖山八營層層圍裹鮑超亟帶太子廟伏軍向山僻小徑偃旗疾趨行至離營二里許聞營中礮聲轟發知老營業已出隊接仗譚勝達等督率各軍分路包圍宋國永乘勢從各營夾縫中擊出截賊數段賊隊譁亂不復成伍正思奪路竄走適淩雲慶等馬步齊至我軍縱橫遏決賊之前鋒鮮有脫者賊之後隊尙欲抵死來援鮑超飛令各將士奮勇衝擊追近茯苓山梁美材大呼突出扼斷歸路羣賊駭懼紛紛竄入田隴眾軍合力蹙之追襲四十餘里遂平高嶺周橋諸壘直抵西河賊乃依水爲險意圖抗拒俄而盧

榮忠統帶礮划由清弋江駛下我軍水陸夾剿倖斬無算立毀堅
巢敗賊始往桃花園灣汴一路而遁西河以北曰馬家園爲眾賊
屯糧之所迤西則曰黃麻渡曰小淮審爲王可陞進兵之地西河
旣復王可陞知羣賊膽寒派蔣占鼐等進取小淮審親督陽華坤
等取道黃麻渡潛襲馬園逆壘時已夜分王可陞令軍士傍壘縱
火悉焚賊糧賊不知官軍之猝至睡夢中急起棄壘狂奔小淮審
之賊正欲聞警赴援蔣占鼐等已砍斷浮橋破卡而入乘勝逐之
躡偏入水者無數沿途卡壘盡毀無遺維時賊之由西河遁入灣
汴者經盧榮忠礮划隨同外江水師日夜轟擊賊不能堪乃縮入
灣汴之後山退聚竹塘旋分大股歸併梅嶺麒麟山意在伺間再
逞鮑超謂賊餒雖衰不速除之終貽後患次日引軍渡河進次紅
楊樹偏壘而陣壘賊匿不出戰我軍相持數時羣以火器環擲延

燒哨棚軍士冒煙突火踰濠直進一壘旣陷眾壘盡亂將弁揮隊縱擊殲獲甚多直追過桃花園竹塘灣汴後山賊皆聞風先遁遂焚其巢是夜鮑超遣書劉松山令於明日自郡城率師來會將有事於梅嶺及麒麟山天甫向曙秣馬蓐食傳令宋國永等十五營專攻麒麟山淩雲慶等馬步八營專攻梅嶺而以劉松山所帶各旗營爲斷後行未十數里賊黨糾眾來迎宋國永同各營哨就山麓布列陣勢直前搏戰潛遣銳卒自山後舉旗先登襲破賊壘周麾而呼賊咸驚疑卻顧宋國永等縱兵掩擊斃賊不計其數麒麟山堅壘悉平是日劉松山亦破廟埠之壘殲賊千餘淩雲慶鄧榮貴等擊破梅嶺之壘並收復仰賢圩各處餘匪分道竄逸一由新河莊敗往東壩一由油榨溝敗往廣德建平臣查西河小淮窩爲水路衝要自被賊踞數月糧運梗阻大爲甯國各營之患幸將士

同心五日之間悉復諸隘距郡城數十里內一律肅清在事人員厥功甚偉力戰陣亡之參將李芳菲等二十六員開單請旨飭部從優議卹以慰忠魂得旨李芳菲等均著照本職本銜從優議卹

○實授吳棠漕運總督仍節制江北軍務以喬松年爲江甯布政使由兩淮鹽運使遷專辦江南北糧臺○戊辰諭議政王軍機大臣等譚廷襄奏擒會各匪竄徧淄川擬回顧省垣仍畱軍東昌一摺李城餘黨及張守義等匪由萊蕪縣境竄至博山徑撲淄川欲與劉德培股匪合併雖經副將范正垣在龍口山截剿未容聯合而淄川城內賊匪已由東關撲出高塘青州兵失利移營城北東關無兵扼紮儻兩股匪蹤合併則勢成燎原長山鄒平章邱等縣路路可虞更恐延及省垣譚廷襄因省東防守空虛擬派兵回顧省城隨即同省並畱軍東昌搜捕餘匪惟莘堂冠館等屬雖僅餘逃散零

匪而直東股匪紛竄靡定難保不渡河而東復同老巢前因畿南
軍情緊要諭令僧格林沁移師直境先清畿輔再赴東省此時重
兵俱聚河西萃堂等屬兵力較單深慮賊匪乘隙東渡譚廷襄務
當嚴密布置將該處防務辦理妥協後再行相機回省毋得顧此
失彼東路賊匪若由淄川西趨省垣則鄒平章邱均係經由大路
該撫務須派撥兵勇前往迎截並迅飭德楞額富和及楊通廉各
軍繞至西北將捻匪一股偏向東南毋令與淄川股匪合併西偏
省垣是爲至要雷鳳鳴勇隊旣經調赴淄川卽著譚廷襄飭令曾
逢年妥爲駕馭並嚴加約束毋許於經過地方逗畱滋擾宋憬詩
勇隊畱交保德防堵萃堂等處能否靜聽約束仍著譚廷襄酌度
情形隨時酌心防範毋違原片一件畱中備覽將此由六百
里諭令知之○○恭奉諭旨奏遵旨覆奏並口陳情一摺倉頭賊巢

中隔孝義喬干等鎮雖因軍馬疲乏未能得手然亦不可示之以弱自當簡選精銳更番輪替使該逆不得休息俟各營疾疫稍平然後出奇制勝自不難一鼓攻克該大臣瘡疾未平內疾復作著再行賞假二十日在營安心調理王萬年等槍傷是否平復著隨時查奏以聞軍士前因村鎮井水不潔飲之多生疾病見更多瘋癩輾腳之症回性兇狡恐其於河水上流置毒可多鑿新井以及汲水或多置解毒之藥於水中並可將疾疫之人另爲一營派弁照料毋令任居大營以免傳染至所稱掘得窖銀二十餘萬兩前已充正餉嗣後並無掘得三百餘萬兩之事請派員查驗等情朝廷前有風聞原知或係訛言未必真確不得不一爲垂詢嗣復據麒麟奏稱聞營內掘得多金故有撥二三十萬兩赴甘充餉之諭既據該將軍奏聞並無其事自係實情況前此數萬及二十餘萬

兩疊據多隆阿詳悉奏聞果有如此巨款諒該大臣斷無不奏之理省城兵力實不爲單乃聞逆回游騎竟敢於郭門之外營壘之傍追殺漢民焚毀村莊以致糧路不通人心疑懼瑛榮身任疆圻全無布置實堪痛恨著穆騰阿瑛榮將省城存兵若干詳細查奏應留若干守城若干駐紮城外其餘俱須分別隊伍自近而遠步步進紮遇賊卽剿既可疏通餉道並免該逆擾近城垣毋再擁兵自衛一籌莫展林守貽誤致干重咎嗣後多隆阿奏報如不甚關緊緊要者著毋庸發六百里加緊以示區別而符體制將此由六百里各諭令知之○己巳 萬壽節停止 御殿受賀○諭議政王軍機大臣等熙麟奏平涼緊急請飭派兵赴平會剿一摺據奏甯州地方本有陝回勾結近又有三原回匪竄至復有宜君匪回盤踞三水土橋而平涼府城爲回匪攻撲勢甚猖獗涇甯二州又

俱戒嚴該督見由慶陽派勇赴援而爲數無多暫紮涇州要隘並已咨行甯夏派撥滿營官兵五百名赴平會剿卽著該將軍如數派撥迅速前往熙麟仍當添募壯勇赴涇與滿兵會合進取力解平涼之圍該督身任兼圻責無旁貸當此事機緊要惟當竭力以圖補救恩麟前奏甘省各路布置尙周自應隨時妥爲策應不得以熙麟見到慶陽於甘境東南一路輒思諉卸並著熙麟將籌兵籌餉各事宜商同辦理延緩官兵頭起已到定邊兩旗蒙兵亦由該縣前赴固原並著飛催前進仍將各路後起之兵星速催提前來俟陸續到齊卽著熙麟相機調遣驛遞軍報極關緊要所請由韓城洛川各州縣添設要站安化定邊等屬暫行雇募走卒之處卽照所議辦理將此由六百里各諭令知之○庚午唐訓方奏苗沛霖以屢服屢叛之賊去歲懾於僧格林沁與楚軍之威跽伏不

動反側之意實未嘗一日能忘臣與僧格林沁知其叵測原欲移
滅擒之師乘勝圖苗特以僧格林沁疊奉諭旨飭勦直東股匪勢
難久待而臣部駐防廬郡梁園蒙亳胡溝等處兵分力單不敷攻
剿故因該逆有撤練交卡之請暫事羈縻俟直東事定江北賊平
兵圖大舉臣旋駐蒙城辦理善後查該逆將蒙東諸營漸次撤退
並傳知各寨於本月十五日齊到下蔡共議歸農臣終虞其狡詐
隨密探所撤隊伍果藏渦河兩岸蠶食新撫谷圩且增修懷遠縣
城添隊死拒其十五日所議則以僧格林沁般姜台浚爲詞謂我
輩所爲終難免死不如先發制人眾心復爲煽動十七日由臨赴
蒙之糧舟與自蒙返臨之小隊往來渦河皆被攔奪據逃回勇丁
所稟均同當經飛飭臨淮蒙宿各營加意防範以待其變至臨淮
爲臣營根本重地擬於十九日乘舟回臨緣渦河道梗祇得率親

軍回營由宿州馳回部署各軍觀釁而動臣查該逆勢眾且悍詭譎百出誠恐勾結蒙亳餘匪大肆鴟張並與東路各匪聯成一片乘虛北犯則燎原之勢益難收拾據臣愚見直東股匪其燄稍衰較之苗逆蓄謀驟發輕重緩急判若天淵合無仰懇天恩速令僧格林沁星馳來皖由蒙城進兵攻其西北臣由臨淮進兵攻其東路其西南壽州正陽霍邱固始一帶請責成曾國藩李續宜撥兵堵剿庶免豕突之憂而除腹地之患上諭議政王軍機大臣等唐訓方奏密陳苗練叛迹復著請飭僧格林沁等會剿一摺僧格林沁兼程北來日內計已馳抵東省此時若即令其折回蒙亳不但徒勞往返且恐直東匪眾聞風思逞餘燄復張著仍遵前旨先將直隸股匪全數剿滅再赴東境酌量賊情分別剿辦將來移師皖境庶無後路牽掣之虞僧格林沁駐皖已久於苗練情形知

之甚悉該練叛迹既著唐訓方兵分力單雖經僧格林沁酌畱馬勇千名亦恐不敷勦辦該大臣仍當設法援應其應如何辦理之處卽著詳細奏聞唐訓方見已馳回臨淮力扼東路西南壽州正陽霍邱一帶防兵已撤甚覺空虛曾國藩前奏所部兵勇制髮逆則不足制苗練則有餘諒能先事籌維妥爲布置李續宜見在行抵何處著曾國藩迅速咨催令其星馳赴皖與曾國藩熟商將壽州等處要隘派兵扼截其南竄之路唐訓方就見有兵力分投防剿毋稍疏虞蒙毫餘匪未淨儻爲苗練勾結勢益鴟張且新撫各圩亦當力爲保護俾爲我用著飭馬新貽督同蒙毫一帶地方員弁妥爲經理苗沛霖屢降屢叛被脅各圩未必甘心從逆唐訓方仍當出示曉諭剴切開導令附近夏圩不至爲苗練所煽誘或卽懸立賞格其有擒獻首逆協助官軍殺賊者卽著該署撫奏請破

格獎勵庶賊黨日孤勦辦較易得手將此由六百里各諭令知之
○壬申僧格林沁國瑞奏三月十四日臣等行抵濟甯查探李城
餘黨與張守義等各股匪眾擾及泰安等處勢極猖獗又連接恆
齡稟報勦辦張錫珠股匪屢獲勝仗並准譚廷襄函稱已將匪首
楊蓬山及張錫珠之子張金堂擒獲是直東匪勢漸衰今有蘇克
金恆齡兩軍馬隊二千餘名或分或合足資勦辦臣等審度軍情
一面札蘇克金與恆齡務當會合進勦聲氣相通遂一面先其所
急由濟甯改道甯陽兼程前進並札行營翼長趙康侯營總何建
鼐帶領步隊兵勇礮位駐紮鄒縣以截教匪出山滋擾之路復據
德楞額等稟稱李城等黨眾竄至萊蕪經德楞額等盡力尾追十
六日馳抵博山探得該匪在縣城東北西河一帶盤踞意在與淄
川踞匪勾結等情臣等因德楞額等兵力較單該匪既欲竄赴淄

川一面派營總倭和赴濟調取新鑄礮位並札副都統定安護礮前進一面督軍趕緊前行十七日馳抵泰安仍督軍由青石關徑至博山會合德楞額等馬步於十九日馳至淄川迤南二十餘里駐紮查探該匪尙在該縣城東一帶盤踞已暗與城內之賊勾合臣等卽於二十日督軍在淄川迤東進剿該匪馬步列仗來迎經我軍奮力衝擊斃賊二三百名奪獲馬匹槍械多件二十一日探得該匪退去數里在紅山一帶盤踞我軍當卽進剿該匪馬步數千仍敢倚山列仗抗拒迫我軍繞路迎擊該匪恃險來撲德楞額富和所帶各隊因山路窄狹賊來勢猛立腳不住經翼長舒通額協理台吉諾林丕勒等揮令各隊竭力迎擊始將賊眾擊退復帶領馬隊從旁鈔擊衝賊隊爲兩段匪勢不支紛紛敗潰我軍乘勢歷過山梁溝坎分四路向東北追擊三十餘里槍擊矛刺斃賊千

餘名其被我軍截斷一股賊匪三百餘名經李其昌帶領步隊圍住悉數擒獲臣等查驗俱係長髮悍賊並賊匪頭目數名當令就地正法救出被裹難民千餘名奪獲馬匹槍礮甚多其餘賊匪翻山向西南奔竄是夜竄入淄川城內與劉德培合夥臣等見札淄川迤北相公廟一帶俟礮位到齊擬卽移營逼近賊巢相機攻剿又奏臣等欽奉諭旨令查通賊降眾查宋憬詩等投誠後其桀驁不馴固所難免惟此時各處賊匪尙未削平若遽行懲辦誠恐操之過急別生枝節兵力無多更難著手卽如苗沛霖前經臣等疊次理諭帶練勦擒並給予餉銀萬兩以示不疑迨張落刑被擒苗沛霖疑懼倍加雖經臣等連次飭令來營苗沛霖一味搪塞竟聲言此乃調虎離山一經到營必無生理似此情形本應主剿臣等再四籌商彼時直東賊匪鴟張撫臣李續宜尙未到皖若臣等一

經進兵難以歇手儻不能北顧則直東之匪益肆猖獗不得不暫
示羈縻此時若將宋憬詩等誘擒處治其隨行降眾必與賊匪結
爲鐵黨更恐勦辦費手臣等再四思維自宜先除賊眾俟直東肅
清後宋憬詩等若敢行爲叵測彼時不難懾以兵威悉除匪類其
雷鳳鳴因營總海羣禁其打糧擅殺海羣馬隊多名並未接據該
員稟報臣等擬俟回至河北再行詳慎查明酌覈辦理譚廷襄奏
鄒縣攷匪竄踞嶧山臣飭署運司恩錫督率諸軍暗襲明攻多方
進取本月十六日孫家穀調隊佯稱赴滕縣會攻寶泉崗幅匪密
飭張體健派隊領路遊擊焦其洲潛由城南繞往城西作爲奇兵
又飭都司康貫均等與張體健小隊隨後接應作爲正兵焦其洲
等疾行六十餘里於四鼓後直抵嶧山南華觀外督同投效縣丞
孫家篤首先踰牆直入砍斃守垛賊數名內應之團總王朝棟乘

勢開門我軍一擁而進將長髮悍賊全行殲斃直至山頂白樓將
教匪死黨數百人殺斃過半餘眾驚遁我軍隨向東北面直下徑
撲後峪火箭齊施圩眾聞風潰散康賈均等亦同時將嶧陽寨攻
克與已革遊擊姚長齡會合上山進剿焦其洲復轉攻徐八寨該
處悍匪最多我軍槍礮齊擊斃賊無數孫家篤又將寨南之鳳山
小寨攻破對壘偏攻火箭然燒房屋煙燄衝霄賊始分投下竄焦
其洲等兩路齊入姚長齡等亦督同毛貴分攻後華宮紅廟等寨
勢如破竹當於十七日將嶧山七寨一律攻克惟山頂玉皇閣悍
賊百餘名堅守不下我軍佯撤下山賊果東遁我軍馬隊追至紅
山一帶殺斃長髮賊一百餘名奪獲槍礮馬匹甚夥救出難民二
萬餘名飭縣安爲安插當卽收隊詎董漸儒義子李四於次日潛
入徐八寨盤踞復經孫家篤派姚長齡等督隊進攻該匪逃上玉

皇閣死守復經派兵密由南路進取直登山頂該匪奪路分遁我軍殺斃數十名追至桃園又殺斃數十名復將山洞搜查淨盡並無匿匪隨即派兵會同協守以備不虞又據總兵黃國瑞稟報探聞嶧縣雲谷山踞匪經該縣知縣張振榮會同勦辦密購內應火器齊施殲斃幅首王洋馬來沅等一百餘名生擒長髮賊蘇祿等五名適黃國瑞派隊趕到該匪勢不能支乘夜率眾向西北逃逸當經救出難民一千餘名立將該山牆垣推倒屋宇焚燒復分攻附近之香山寨殺幅首滿盈及夥匪數十名救出難民三四百名又將香山收復敗逃之匪追殺數十名其餘併向北路竄去見在嶧山敗匪竄回老巢雲谷山匪併入鳳凰山爲合夥負嵎之計以兗沂大局而論郊嶧已無匪圩蘭費次第掃蕩敗殘餘黨將以鳳凰山爲遁逃藪兗營彌形喫重必須乘勢迅速圍攻而見在兗營

兵力愈分愈單不敷布置聞僧格林沁尚在後起步隊東來擬駐
鄒縣進剿臣已飭恩錫等嚴防各匪竄突力籌進攻之策仍飛催
黃國瑞將蘭費餘匪趕緊殄滅移師西向並飭張振榮搜捕嶧縣
匿匪以靖地方至此次在事文武一日連克七寨並平毀巨巢實
屬異常奮勉除嶧縣出力人員彙案覈辦外所有鄒縣尤爲出力
人員相應開列奏懇給予獎勵其餘出力人等查明彙案請獎以
昭激勸 上諭議政王軍機大臣等僧格林沁因探悉捻匪李城
餘黨與張守義等各股擾及泰安等處遂由濟甯改道甯陽前進
派令趙康侯等步隊駐紮鄒縣該大臣會合德楞額之軍在淄川
迤東進剿雖連日疊有斬擒而該匪盤踞淄川城東暗與城賊勾
合經官軍追至狼山均遁入淄川城內該大臣見紮淄川迤北一
俟礮位到齊卽行移營進逼賊巢相機攻剿所辦甚合機宜著卽

催提礮位到齊激勵各軍乘機進取務將劉德培等兇渠就地殲
擒毋任外竄直隸股匪雖有蘇克金等軍勦辦該大臣如能早靖
東匪迅速來直必更得力所查宋憬詩等情形均悉卽照所議妥
爲駕馭仍將雷鳳鳴是否曾有擅殺海羣馬隊情事查明辦理正
在寄諭閒譚廷襄奏到籌防東路並攻克嶧山七寨收復雲谷香
山賊巢各摺片嶧山與鳳凰山東西犄角而雲谷山又爲嶧匪巨
巢此次官軍設法攻取辦理尙爲得手惟見在嶧山餘匪遁回老
巢雲谷山敗匪併入鳳凰山合夥負嵎恃爲遁逃淵藪必須乘勢
迅速攻擣著譚廷襄嚴飭恩錫等速籌進取嚴防各匪乘閒奔突
並著飛催黃國瑞乘此聲威速將蘭費餘匪殄滅以靖地方鳳凰
山賊勢旣孤攻勦較易爲力著卽飭趙康侯何建鼇步隊會合恩
錫併力攻取僧格林沁卽可就近督飭相機勦辦譚廷襄見已回

省著卽嚴飭曾逢年等速將淄城乞濠等事剋日妥辦豫備僧格
林沁大軍進攻毋稍延誤山東省城至章邱鄒平一帶防務並著
妥爲布置責成守備張大富等認真防剿畿南股匪見飭劉長佑
督飭諸軍辦理僧格林沁仍應隨時偵探與劉長佑聲息聯絡催
飭蘇克金星速前進與恆齡馬隊合力馳剿仍著譚廷襄督飭保
德將冠縣堂邑一帶餘孽搜除務淨並嚴防河西敗匪回竄與直
省官軍隨時策應毋再任賊往來自如致干咎戾所查王洛月卽
王冠珠見在恩縣並未回籍滋事其弟王貫三等亦均未在東等
情仍著隨時詳細訪查毋令奸匪得以潛匿將此由六百里各諭
令知之○諭張之萬奏皖匪竄徧豫疆派兵堵剿並飭余際昌回
豫各摺片皖省朱圩踞匪避兵竄出糾集各黨四出焚掠甚屬狡
獪張曜等各營兵力過單見攻項城等處各匪勢難兼顧該撫已

將派赴河北堵剿之敖天印一軍調回輔以劉自順馬隊令其馳赴沈邱探明賊蹤所向迎頭截擊著張之萬毛昶熙卽飭該參將等迅速進兵一面激勵鄉團隨同助剿毋令寇蹤闌入邊境並飭張曜尹嘉賓速將尙店袁安愚等寨土匪撲滅免致勾結爲患此股捻匪本係皖省餘燼見復擾及兩省邊界誠恐此剿彼竄蔓延日廣著唐訓方迅卽派兵會合豫軍兩面夾擊以期及早肅清毋稍遲延觀望致誤事機直隸賊匪蹤迹飄忽分合靡常見在廣平大名一帶紛竄難保不再擾豫疆蘇克金見已管帶馬隊擬由河南衛輝一帶前進著張之萬速行咨催令其迅赴直隸迎頭堵擊並嚴飭楊長春等軍扼守臨漳內黃一帶不可任令匪蹤竄入僧格林沁見已督兵行抵山東淄川縣境攻剿踞城賊匪及竄入淄城之李城餘黨勢難遽回皖省俟東省直隸軍務次第肅清再行

移師南下唐訓方惟當聯絡過河南北民圩協助官軍毋令被苗
練裹脅並將壽鳳兩處城鄉兵團嚴密布置相機進剿余際昌越
境追賊已及麻城兵疲餉乏勢難再行前進張之萬因廬州戒嚴
該省偏近皖疆飭令該總兵回豫酌留三營分防商固邊境餘兵
俱撤回汝郡著卽照所擬辦理陳大澐等股匪旣擾至蘄州有謀
竄黃梅廣濟宿松東下之說則黃州東路防堵益當嚴密官文嚴
樹森務當督飭諸軍繞向東路兜截迅將該匪就地殲除不得以
驅賊出境卽爲了事穆正春等各軍尙紮巴河楊朝林一軍由白
果進紮黃麻均成大吉一軍屯紮團坡均距蘄州數十里何以尙
未接仗著官文等查明具奏並著嚴督諸軍速行進剿毋任延玩
將此由六百里各諭知之○癸酉 上復詣 大高殿祈雨○諭
內閣前因駱秉章韓超各奏雲南省城被匪襲陷督撫司道均被

戕害當經降旨令駱秉章派兵援剿該省文武下落及督撫司道等死難情形一併詳查具奏乃本日復據徐之銘報稱迤西逆匪杜汶秀勾結武定嵩明尋甸等處賊匪於正月初旬帶練眾數千先後至省十三日馬榮又帶練三千來省署總督潘鐸令將該練等攔截在城外住宿止准馬榮帶跟丁五六十人入城十五日潘鐸在南門彈壓復親赴五華書院勸諭解散該逆等抗不遵依猝然鼓譟該署督身受六傷登時遇害徐之銘會同署藩司岑毓英等分投巷戰署雲南府知府黃培林署昆明縣知縣翟怡曾均力戰陣亡二月初一日署總兵馬如龍帶隊進城將五華書院等處賊營攻破生擒僞都督李俊並將僞都督馬士麟殺斃城內一律肅清並於李俊身邊搜獲杜逆所給僞札當將李俊凌遲處死各等語與駱秉章等前奏大相歧異徐之銘在滇有年於同眾勾結

進城未能先事防範致令督臣被戕府縣殉難該撫尙覲然苟活
實屬咎無可辭徐之銘著卽革職來京聽候議罪署雲貴總督潘
鐸萬里赴滇不避艱險卒能見危授命大節凜然實堪痛惜潘鐸
著加恩照總督陣亡例交部從優議卹並入祀雲南省城昭忠祠
其靈柩由雲南回京時著沿途地方官妥爲照料伊子四人著俟
服闋後由吏部帶領引見尋予祭葬世職諡忠毅○諭議政王軍
機大臣等據徐之銘奏迤西逆匪杜汶秀勾結武定等處賊匪謀
襲省城署督臣等被戕見經勦辦省城內外一律肅清一摺前因
駱秉章韓超先後奏報雲南省城失陷當經降旨宣布寄諭駱秉
章等以川黔軍務均尙未竣勢難卽行進剿惟當力守東昭防賊
四竄於川黔接壤處所一體嚴防以爲他日進兵地步茲據徐之
銘所奏雲南省城失陷情形與前駱秉章等所奏均各歧異閱徐

之銘所奏迪西逆匪杜汶秀遣其僞大都督李俊等乘馬如龍出省未回句結武定嵩尋等處匪回數千賺入省城經督臣潘鐸飭令出城駐紮遣散忽於正月十五日潘鐸在五華書院被戕回匪全擁入城徐之銘赴掌回教馬德新寓所會議防守並好言撫慰飛催馬如龍檄調各路練勇於二月初一日回省商同署藩司岑毓英等分投攻打城內賊營賊已敗潰出城城內肅清並將擒獲之李俊等處死等情種種支離殊難憑信雲南省城見在情形殆不堪問賈洪詔亟應赴任惟貿然前往於事亦屬無濟著卽仍遵前旨率同林鴻年等前赴昭東駐紮將滇省實在情形確查具奏並卽出示曉諭仍分良莠不分漢回一切持平辦理將徐之銘屢有被參之案此次省城之變自請治罪朝廷另簡該撫赴滇係爲安輯地方並非以徐之銘撫回爲罪等語剴切開示以杜奸人從

中煽惑韓超前派李有恆帶兵馳赴東昭援剿兵力尙單曾經諭令駱秉章酌派官軍協同防守所有東昭各軍卽著賈洪詔妥爲統率以資鎮遏張亮基何日行抵黔省勞崇光計亦可到卽著會同將滇省情形偵查的實如何辦理與駱秉章熟籌迅速具奏此時川黔與滇接壤各路防堵尤應嚴密該督撫等務當妥爲布置以防奔突並爲將來進剿地步張亮基未到以前韓超仍屬責無旁貸不得輒思諉卸潘鐸帶有家丁八人是否均被戕害著駱秉章賈洪詔查明詢悉此事啟釁根由具奏徐之銘原摺著鈔給駱秉章等閱看將此由六百里各諭令知之○以雨澤稀少詔清理庶獄○甲戌諭議政王軍機大臣等劉長佑奏親督各軍截剿股匪殆盡餘匪悉數渡河一摺另片奏東省莘堂冠館之間賊巢林立請飭山東撫臣於大兵進剿之日調派柳林團勇助剿等語逆

匪竄擾直境分南北兩股意在牽掣官軍經劉長佑督飭各路帶兵文武員弁合力兜剿先後在冀州沙河臨洺等處殲斃賊匪甚多該匪被剿狂奔由尖莊東北之蔣家莊等處悉數渡河著劉長佑督同臬司迅將河西防守事宜嚴密布置並著調馬步各軍齊赴沿河擇要駐紮力杜回竄之路河東捻教各匪甚多該匪見已竄回老巢著譚廷襄嚴飭保德督率各營兵勇會同直隸各軍將竄回河東股匪兩路夾攻務須責令悉數殲除不可粉飾遷延再貽後患僧格林沁進兵淄川蕞爾縣城諒不難剋期攻拔此股竄回河東之匪如東省兵力不敷分剿仍著該大臣妥籌策應東省匪徒蔓延十餘州縣匪首之多以萃冠爲最百姓被其煽惑脅從以致良莠不分將來大兵進剿該匪散歸各縣各村甲長旣不敢據實舉報地方官復起而諱飾之凱撤後該匪乘閒嘯聚餘燼復

然貽患伊於胡底堂邑之柳林團不肯從賊各匪與之爲仇誓必破其團而後快朝廷早有所聞該團勢成孤立若地方官與之聯爲指臂該團無不樂效前驅著僧格林沁譚廷襄選派明幹大員酌調該團勇丁隨營助剿導引前路庶可以指賊所在搜殺無遺被脅良民亦不至無辜被戮程順書李汶光臨陣乞降日久終恐反側劉長佑見雖設法羈縻務須妥籌區處將此由五百里各諭令知之○諭耆齡奏臺灣官軍剿匪情形添派曾元福馳往夾剿及嘉義解圍並遵將閩省援師分駐金處各屬情形各摺片臺灣逆匪係烏合之眾乃剿辦幾及一年兵勇愈多而未能得手卽此次嘉義解圍亦屬笨港紳民之力居多是否吳鴻源等不能得力抑係事無專責各相觀望該郡爲閩省屏蔽豈可任令肆擾見在義勇等得有勝仗軍聲漸振左宗棠雖駐紮嚴州相距較遠第身

厲兼圻責無旁貸該督曉暢戎機卽著統籌全局嚴飭各將士迅將斗六彰化克復及早蒞事並著徐宗幹洪毓琛就近商辦毋任稽延耆齡援浙各軍前諭統歸左宗棠調度見在分紮東陽等處尙足爲後路聲援惟據該將軍奏稱經費支絀量爲裁減左宗棠所統兵勇是否足敷布置備聞軍尙可裁減自應酌量裁汰以節餉需並著該督妥籌辦理以副委任將此由六百里諭知左宗棠徐宗幹並傳諭洪毓琛知之○諭前因已革呼徵呼圖克圖解送到京特派文祥會同都察院堂官審辦並令將滿慶先後奏報情形彙案秉公查覈茲據該大臣等查明覆奏據稱呼徵不能約束僧俗致因布施小事啟釁實有應得之咎惟據供稱滿慶調汪曲結布來藏曾收受元寶八十箇案關徇私納賄虛實均應徹底根究至滿慶所奏呼徵專權驕橫調兵滋事並使蒙古喇嘛假冒王

公名色及拆橋逃遁各情均與呼徵見供不符請飭福濟會同景紋逐款訊辦等語呼徵呈訴汪曲結布賄送滿慶元寶一節雖據供稱傳訊之張喇嘛業已身故無憑提質惟滿慶前後各摺始則奏請京中能事喇嘛赴藏繼又懇派汪曲結布輔佐達賴喇嘛已屬自相矛盾又屢次奏報均稱兩造鬪殺該大臣開導勸解迨奉旨查詢呼徵逃走情形又稱諭令僧俗圍住惜德寺並派兵追緝呼徵是此事皆由滿慶主持調派尤與前後情節不符且汪曲結布果係外番畏服何以當呼徵稟革之時滿慶不爲保留且回文內稱辦理甚善前據秉章奏查訪西藏啟釁情形一摺亦與滿慶奏報情形迥異種種疑竇誠難保無別項情弊著福濟景紋提集人證秉公逐款詳訊一俟得有確實情形定擬具奏不准稍有回護瞻徇自干咎戾至滿慶所奏酌揀番目請補噶布倫等缺及

籌議變通章程五條皆係轉據李玉圃汪曲結布二人稟詞辦理有無情弊並著福濟景紋查明覈辦呼徵呼圖克圖等如令其赴川對質道途多梗恐致耽延時日已交理藩院轉飭喇嘛印務處看管矣原摺著鈔給閱看將此各諭令知之○乙亥李鴻章奏自福山攻克常昭解圍後太倉守賊僞會王蔡元澐屢次遞稟乞降情詞懇摯臣未忍絕其自新之路因剴切札諭並派員入城開導勸令及早獻城該逆首請卽於三月初九日派隊分紮四門豫備接應程學啟等如期嚴陣以待是日東門忽出賊匪數千頭紮白巾聲稱排隊迎接南門又出賊萬餘各路伏賊齊起我軍分投迎剿眾寡不敵致被衝動李鶴章所部各營已偪東南城根且戰且退李鶴章骹受槍子傷幸不甚重程學啟所部進扼西門當崑山來路又有賊數千自崑山來並有賊船八十餘號程學啟派弁迎

探見該逆語言親密恐有詭計當飭各軍準備出戰忽大股賊由南門鈔出又由西門突出悍賊數千蠡擁來撲前後圍繞程學啟揮令各將士併力攻勦戰數十合斃賊千餘仍將該逆擊退該逆竄撲婁塘前敵營盤副將梁安邦等擊走之其時戈登李恆嵩已帶常勝軍由松江圖攻崑山臣聞信卽調該兵官徑赴太倉合力進攻復派編修劉秉璋馳往幫同李鶴章料理出隊程學啟與戈登等面商妥協卽於次日督派三營進紮太倉西門並調副將陽利見帶淮揚水師中營同紮西門大河戈登李恆嵩帶隊由南門進毀賊卡三座十四日逆首際天福李汶熙帶礮船三十餘號堵截河口程學啟派洋槍隊四百餘名繞襲該逆後路自督水陸各營兩面轟擊奪獲礮船多隻該逆窮蹙乞降當將逆首際天福並偽燕豫等十九名悍賊百餘名悉數誅戮城賊出援又經擊退賊

膽已寒戈登復帶礮位至程學啟營前安設先將西門賊築石壘二座全行轟破程學啟派隊守之李鶴章派隊進紮南門防賊竄逸戈登排列大礮在西門外連環轟擊城垣斃賊甚多該逆仍死拒不退我軍添礮四面開放自已至申擊倒城頭悍賊不計其數轟裂城垣十餘丈各營奮勇搶越城濠一擁而上刀砍槍擊賊眾披靡該逆欲由南門出竄又被我軍擊回程學啟戈登李恆嵩等登時進城捕殺各軍因賊詭降屢次拒傷官兵立將城賊萬餘人圍而殺之偽會王率二千人突圍由北門逃出程學啟等派隊緊追立擒蔡元漟誅之餘匪追斬殆盡遂於三月十五日克復太倉州城見飭李鶴章帶隊入城布置防守程學啟仍會同戈登乘勝進攻崑山以聯常昭之氣此次在事出力人員並傷亡弁勇容臣查明彙請獎卹 上諭議政王軍機大臣等見在太倉既復則崑

山賊膽必寒著李鴻章督飭程學啟會同戈登指日攻克進規蘇城以牽忠逆北竄之勢常昭雖甫經解圍而見與滬上各軍聲勢聯絡可保無虞若駱國忠等能出奇伺隙亦足以擾賊謀並著該撫密籌辦理以收多方誤賊之效本日據御史王蘭谷奏金壇三次被圍均由紳民捐貲辦團協同官軍戰守請飭查明獎勵等語金壇以彈丸小邑固守至一百三十日之久該紳民捐貲協守情殊可憫著李鴻章查明奏請補獎以昭激勸至該御史所稱該紳民等見在附居鎮江左近希冀招集流亡辦團助剿克復金壇揆之情理恐難有成且難保非該御史因欲迅邀獎敘爲此聳聽之詞並著該撫酌量辦理原摺著鈔給閱看將此由六百里諭令知之○譚廷襄奏據黃國瑞及沂州府知府文彬暨長廣王成謙等稟報匪寨以費縣爲最多見據寨首岳相林張寶貴王平帶同費

縣之新莊戴莊等十三圩眾八百餘名來營懇請效力贖罪經黃國瑞收錄派入各隊並令參將張從龍等帶同馳往轉圍山進攻該匪尙圖抗拒張從龍等用礮轟開圩門一擁而入生擒匪首崔立馮莽高闖等三名餘匪剿殺淨盡槍礮旗幟全行起獲其餘長壽山等九圩不敢復抗王成謙等順道搜斬逆匪餘悉收撫其蘭山縣境之黃牛山等六圩尙未靖平並探知尙嚴玳路等處爲萬家生等久踞之地尙有餘匪依附藏匿萬家生潛行招集又有巨匪劉業居來往同謀因卽密派參將張祖雲等乘其不備徑赴尙嚴該匪紛紛外竄當將萬家生等擒獲正法並將竄匪三百餘名斬殺無遺黃牛山等寨均經投誠蘭費各圩俱已平定沂屬全境肅清臣查沂州府屬民風强悍從前本有匪黨結幅搶劫軍興以後更復鴟張蘭鄭費三縣西南數百里內大小一百餘圩列寨分

旗各相雄長今王成謙等陸續剿撫沂屬積年伏莽一旦廓清洵堪欣幸惟撤防以後仍恐故智復萌臣已諄飭長廣王成謙等酌覈衝要地面將蘭費練勇分紮中村尙巖新莊馬莊平邑集等處以資彈壓並催黃國瑞迅速拔隊由寶泉固一路會攻鳳凰山卽飭精壯降眾隨營效力俟克屬教匪殄滅再將沂勇酌量全裁一面飭令該地方官親歷圍寨搜拏逃匪招集流亡將一切善後事宜妥籌辦理在事出力文武紳團應俟查明彙覈請獎又奏查捻會各匪與淄逆併力踞守見經僧格林沁督之長濠圍困並由濟甯添調礮位輓運前進誠恐該匪情急西竄已豫飭章邱等縣扼要嚴防見准僧格林沁函約臣赴淄川會同剿辦惟續據探報教匪與劉雙印等合股由鳳凰山竄向東北本月二十三日至蒙陰之常馬莊經兵團擊斃多名旋竄新泰之三里莊及羊流店迤南

之翟家莊一帶該處偏近北路省城南面空虛當卽飛調都司楊通廉等軍馳往泰安扼擊臣卽於二十七日親帶小隊馳赴淄川會剿上諭沂州府屬民風強悍蘭費等縣匪圩林立分旗列寨各自稱雄見雖懾於兵威不敢抗拒恐撤防以後故智復萌暗長潛滋不可不加意防範著僧格林沁譚廷襄嚴飭該員弁搜捕餘匪務盡根株並密飭該地方官隨時偵察新撫各圩如稍萌反側卽迅速拏辦從重懲治以儆其餘見在教匪與劉雙印等合股由鳳凰山竄向新泰縣之三里莊翟家莊一帶教匪老巢自必空虛譚廷襄催令黃國瑞拔隊由寶泉崗一路進攻著卽飛飭該總兵迅速會同各軍乘虛進擣埽穴擒渠廓清兗境並著檄飭都司楊通廉等軍馳往泰安扼賊北竄之路淄川踞匪醜類無多僧格林沁督竄長濠並添調礮位進攻不難克復第該匪窮蹙他竄亦意

中事不可不豫爲之防譚廷襄見赴淄川務當嚴飭章邱等縣調
集團勇四面兜擊俾該匪遁竄無路官軍一鼓殲除方爲妥善將
此由六百里各諭令知之○于甘肅陣亡知州托克清阿祭葬世
職○丙子以孟夏時享 太廟 上前期親詣行禮○諭內閣軍
興以來各直省百姓慘遭荼毒凡有臨難捐軀守義殉節者一經
地方大吏奏聞無不立沛恩施優予卹典因思漢回皆朝廷赤子
國家一視同仁原無歧異去年陝省逆回滋事以來延及甘肅地
方亦有被其煽惑者朝廷命將出師分投剿辦特以該逆回等攻
城戕官叛逆昭著非大加懲創不足以戢暴亂而安良善並非以
凡屬回民卽應槩行誅戮也各該省回民受國家二百餘年豢養
之恩豈盡甘爲匪類聞各省良回中深明大義或被脅不從以致
仗義捐軀全家遇害者頗不乏人哀此無辜殊堪矜憫前已疊經

降旨諭令統兵大員等止分畧莠不分漢回諒各地方官吏及帶兵員弁等必能仰體祇遵辦理惟念各處殉難被害回民轉致湮沒不彰與甘心叛逆者同歸於盡不得與漢民一律同邀卹典殊不足以示矜恤而廣皇仁著陝西甘肅等省地方大吏及統兵大員等於各該地方回民中確切訪查如有實係畧回不肯從賊被逆回逼脅奮身死節及合門殉難者一體分別查明奏請旌卹毋得稍存漢回成見以示大公○是月蠲緩福建崇安縣被水新舊額賦緩徵甘肅固原等二十州廳縣暨沙泥州判所屬被水霜風凍新舊錢糧